

# 1 Corintios

*Pablo Goãmũ yarãre Corinto majarãre gojabeoñumi*

<sup>1-2</sup> Yũhũ Pablo, Jesucristo yare ïgũ buhedore apidigũ ãhraa. Goãmũ ïgũ gamero dopa ta Jesu ïgũ apibure yũre beyerũ ïgũ. Sostene Jesu yagũ mari acaweregũ mera mũare Goãmũ yarãre Corinto majarãre gojabeoa gũa. Jesucristo mera majarã mũa árĩcũ Goãmũ yarã árĩmorãre beye aĩdi árĩmi Jesucristo mũare. Eropirã árĩpehrero majarã gajirã mari Opũ Jesucristore serẽrã árĩrã, erã sã Goãmũ yarã ta ãhrima. Jesucristopũ erã opũ mari Opũ sã ãhrimi.

<sup>3</sup> Eropirã Goãmũ mari Pagũ, mari Opũ Jesucristo mera mũare õadorea. Ìgũ itamuri mera õaro árĩque mũa.

*Jesucristopũ mũare õaro iibasadigũ árĩmi Goãmũre, arĩ gojañumi Pablo*

<sup>4</sup> Jesucristo mũare õaro iibasadigũ árĩmi Goãmũre. Ìgũ eropa iicũ ïagũ, Goãmũre yũ mahigure, Õhaa,” arãa yũhũ mũmuri nũcũ.

<sup>5</sup> Cristo yarã mũa árĩcũ ïagũ Goãmũpũ mũare õaro árĩcũ iimi. Eropigũ ïgũpũ ïgũ yare mũare gajirãre weremorãre iimi ïgũ. Eropigũ ïgũ, ïgũ yare õaro masicũ iimi mũare.

<sup>6</sup> “Cristo mũare õaro iigũcumi,” mũare gũa arĩ werediro ta wahabũ mũare Cristo yarã mũa wacũ.

7 Eropigu árĩpehreri ïgu ya árĩburire mũa iimasicũ iimi Goãmũa mũare. Eropiro ne duhyabeaa mũare. Mari Opũa Jesucristo i yebague ïgu dujariborore mũa corerisubu Goãmũpũa mũare eropa itamuniguicãgũcumi.

8 Eropigu Jesucristopũa mũa ïgũre umupe-oniguicũ iigu aħrimi. ïgu eropa árĩgu árĩcũ mũapũa i mũũ pehrecũ mũa ñeri iira dipuwaja moorã árĩcũ iigũcumi.

9 Goãmũa “Ōpa iigũra,” ïgu arĩdiro dopa ta ïgu iimi. Eropigu ïgu, ïgu magũa mari Opũa Jesucristo mera yujuro mera árĩmorãre marire beyedi árĩmi.

*Jesu yarã Corinto majarã erã game dũaca warirare Pablo arĩ gojañumi*

10 Yũa acawererã, mari Opũa Jesucristo ïgu dorero mera mũare bũrigã serẽbu iiaa: Mũa basi game dũyasobiricãque. Eropirã mũa basi game dũaca waribiricãro gahmea. Yuju curu ta árĩque mũa. Eropirã yujuropa ta õaro árĩniguicãque. Eropa iirã mũa iiburire pepirã, yujuropa iique mũa.

11 Yũa acawererã, mũa basi game dũyatorã iayoro mũa. Eropa arĩ wereama Cloé ya wihi majarã yũre.

12 Gajirã mũa mera majarã õpa arãñorã: “Pablo ya curu majarã aħraa gũa,” arĩ werenigu-iayoro gajirã mũa. Eropirã gajirã “Apolo ya curu majarã aħraa gũa,” arãyoro gajirã. Eropirã gajirãpũa daja, “Pedro ya curu majarã aħraa gũa,” arãyoro mũa. Eropirã gajirãpũa daja,

“Gua tamera Cristo ya curu majarã ãhraa gua,” arãyoro mua.

<sup>13</sup> Mua eropa arĩquerecũ ta yũhũ òpa werea mũare: Cristo ya curu majarã yuju curu ta ãhraa mari. Eropirã mari basi yujurãyeri dũca warimasibea mari. Yuju curu ta árĩrã iiaa mari. Yũhũ Cristo árĩbeaa. Īgũ iidiro dopa mua ya dipuwajare crusague sĩridigũ árĩbeaa. Eropigũ mũare gajigũ waĩyegũ yaha waĩ mera waĩyebemi. Cristo ya waĩ mera waĩyecumi mũare.

<sup>14</sup> Mũare mua mera majarã sãre waĩyebiribũ yũpũ. Crispore, Gayo sãre erã dihtare waĩyebũ yũhũ. “Pablo waĩyenirã dihta ãhraa,” arĩmasibea mua. Eropigũ gajirãre waĩyebiridigũ yũ árĩgũ “Õhaa,” arĩ pepia Goãmũre.

<sup>15</sup> Bajarã masare waĩyedigũ yũ árĩcũ “Pablo ya waĩ mera ĩgũ waĩyemi guare,” arĩboaya mua. Eropa arĩrã Jesucristore umupeobirã mua yũpũre umupeoboaya. Eropigũ irire gamebirabũ.

<sup>16</sup> Estéfana ya wihi majarã sãre waĩyebũ yũhũ. Erã nũcu ta waĩyebũ yũhũ. Gajirã yũ waĩyenirãre guñabirica.

<sup>17</sup> Cristo yũre obeogũ, gajirãre waĩyebure apibirimi ĩgũ yũre. Õari buherire werebupũre apimi ĩgũ yũre. Iri òari buheri “Cristo ĩgũ crusague sĩriñumi,” arĩ buheri masare gohrotori buheri ãhraa Goãmũ yare erã iiburire. Eropigũ yũhũ irire buhegũ gajigũ òaro masitarigũ iro dopa buhebeaa. Masa erã masiri mera buhebeaa. Yũhũ eropa yũ ejatuharo mera buhecũ

mua òari buheripure umupeobiriboaya.

*Goãmũ ïgũ turarire ïgũ masiri sãre opagũ  
ãhrimi Cristo, arĩ gojañumi Pablo*

<sup>18</sup> Peamegue dederemorãpũ iri buheri “Cristo crusague ïgũ sïridi árĩmi,” arĩ buherire peerã òpa arĩma: “Pee masibirã ya buheri ãhraa,” arĩmaacãma. Maripũ Cristo ïgũ taumorã árĩrã òpa arãa: “‘Crusague ïgũ marire sïridi árĩmi,’ arĩ buheri tura ãhraa. Iri buheri mera Goãmũ marire gohrotomi,” arãa mari.

<sup>19</sup> Eropa ta arĩñumi Goãmũpũ ïgũ yare erã gojarapũgue:

Eropirã i yeba majarã masare “Õaro masirã ãhraa,” erã basi arĩrãre erã masiripũ duhpiburi árĩbeaa, arĩ ïhmugũca yũhũ, arĩñumi Goãmũ.

<sup>20</sup> Eropirã i yeba majarã òaro masirã duhpimorã árĩbeama. Erã pepiro dopa buherã sã duhpimorã árĩbeama. Dohpaguere wereniguimehrerã sã duhpimorã árĩbeama. I yeba majarã “Õaro masirã ãhrima,” arĩnirã erã árĩquerecũ ta “Pee masibirã erã ãhrima,” arĩ ïhmumi Goãmũ erãre.

<sup>21</sup> Goãmũ tamera òaro masigũ ãhrimi. ïgũ eropa árĩcũ i yeba majarã erã ya masiri mera Goãmũ yare ne masisũya mariroca erãre. Goãmũ “Erã masiri mera yũre masisome,” ïgũ arĩdiro dopa ta eropa wahabũ erãre. Òpa arĩñumi: “Yaha òari buherire werecũ masa yũre masirãcoma,” arĩñumi. Eropigũ “Iri buheri pee masibirã ya buheri ãhraa,” gajirã arĩquerecũ, gajirãpũre erã òari buherire peerãpũre Goãmũ

taumi. Cristore erã umupeocũ ïagu “Erãre peamegue wabonirãre taugura,” arĩmũhtarũ.

<sup>22</sup> Judio masa deyoro moarire ii ïhmudorema erã iri buherire umupeoboro core. Eropirã griego masa judio masa árĩbirã árĩrãpũ erã pepiro dopa buhecũ gahmema.

<sup>23</sup> Maripũ “Jesucristo mari ñeri iira dipuwaja crusague sĩridi árĩmi,” arĩ buherire buhea mari. Iri buherire peerã judio masapũ gamebeama. Eropirã iri buherire judio masa árĩbirãpũ “Pee masibirã ya buheri ãhraa,” arĩma.

<sup>24</sup> Goãmũ ïgu yarã árĩmorã ïgu beye aĩnirãpũ iri buherire pee õpa arĩ masima: “Goãmũ masipehogũ turagũ ãhrimi. Cristo marire sĩribasara mera marire peamegue wabonirãre Goãmũ taumi,” arĩ masima. Erã judio masa, judio masa árĩbirã sã eropa arĩ masima Jesu yarã árĩrã.

<sup>25</sup> Goãmũ õaro masipehogũ ãhrimi. “Goãmũ pee masibigũ ãhrimi,” masa arĩ pepiquerẽcũ ta i yeba majarã tauro õaro masipehogũ ãhrimi. Eropigũ “Turabigũ ãhrimi,” masa arĩ pepiquerẽcũ ta erã wecague turatarinũgagũ ãhrimi ïgu.

<sup>26</sup> Yũ acawererã, Goãmũ mũare ïgu beyeboro core mũa árĩmũhtarare guñaque. I yeba majarã “Õaro masirã ãhrima,” erã arĩnirã watopegue Goãmũ mũare bajamerãgã dihtare beye aĩdi árĩmi. Eropirã masa tĩrã oparã sã arĩnirã bajamerãgã ãhraa mũa Jesu yarã.

<sup>27</sup> I yeba majarã “Pee masibirã ãhrima,” erã arĩnirã watopepũre mũare Goãmũ beye

aĩdi árĩmi. Eropa beyedi árĩmi “Õaro masirã ãhrima,” erã arĩnirã erã masibirã dujaboro dopa. Eropigũ i yeba majarã “Turabirã, doyarã ãhrima,” erã arĩnirãre Goãmũ aĩdigũ árĩmi doyabirãpũ erã doyarã dujaro dopa.

<sup>28</sup> Masa erã ĩadiabirãre “Duhpimorã árĩbeama,” arĩma. Erã eropa arĩnirãre bu árĩrãre Goãmũ ĩgũ yarã árĩmorãre aĩdigũ árĩmi mũare. Eropa aĩgũ i yeba majarã oparãre, guhyadiarãre, “Gũapũ bu árĩrã ãhraa,” erã arĩcũ iigũ iimi Goãmũ erãre.

<sup>29</sup> ĩgũ eropa iicũ i yeba majarã ne yujugũ ĩgũ gamero mera “Yũ tamera turagũ, õaro masigũ ãhraa,” arĩ tarinũgamasibeami Goãmũ ĩgũ ĩacũ.

<sup>30</sup> Goãmũpũ marire Jesucristo yarã árĩcũ iimi. ĩgũ yarã árĩrã mũmuri mũcũ Goãmũ mera árĩrãca mari. Jesucristopũ Goãmũre õaro masicũ iimi marire. Eropigũ mari ñerire cóãgũ marire õarire gohrotocũ iigũ ãhrimi. Eropigũ marire peamegue wabonirãre taubu ãhrimi.

<sup>31</sup> ĩgũ eropa iicũ Goãmũ yare erã gojarapũ ĩgũ arĩ gojadiro dopa ta eropa wahaa. Õpa arĩ gojañuma: “‘Yũ gamero masipehogũ ãhraa,’ arĩgũ irire arĩbiricãporo. Õpa arĩporo: ‘Mari Opũpũ masipehogũ ta ãhrimi,’ arĩporo ĩgũ,” arĩ gojañuma Goãmũ yare erã gojarapũgue.

## 2

*Cristo crusague ĩgũ sĩrira buheri ãhraa i, arĩ gojañumi Pablo*

<sup>1-2</sup> Yũ acawererã, mũa pohro wabu õpa arĩ pepibũ yũpũ: “Erã mera árĩgũ Jesucristo

crusague sīridigũ waĩpeo ĩgũre erã masiburi dihtare buhegũra erãre,” arĩ pepibũ mũare. Eropigũ mũa pohro árĩgũ Goãmũ yare mũare buhebũ. Goãmũ yare mũare buhegũ, weretarinũgagũ iro dopa “Masitarigũ ãhraa,” arĩ buhegũ iibiribũ.

<sup>3</sup> Eropigũ mũa mera árĩgũ bu árĩgũ iro dopa árĩbũ yũhũ. Eropigũ yare umupeori arĩgũ doyañariro dopa buhebũ yũhũ.

<sup>4</sup> Eropigũ Goãmũ yare buhegũ “Masipehoa yũhũ,” arĩgũ weretarinũgagũ iro dopa buhebiribũ. ĩgũ yare buhecũ Espĩritu Santo ĩgũ turari mera mũare iri buherire umupeocũ iimi.

<sup>5</sup> Eropa ta arĩ buhebũ yũhũ mũare masa erã gamero erã ya masiripũre mũa gamebiriboro dopa. Goãmũpũre mũa umupeoburire eropa arĩ buhebũ yũhũ “Goãmũ turagũ ãhrimi,” mũa arĩboro dopa.

*Espĩritu Santopũ Goãmũ ĩgũ árĩricũre buhemi marire, arĩ gojañumi Pablo*

<sup>6</sup> Eropirã Goãmũ ya buherire Jesure ðaro umupeorãguere werea gũa. Iri buheri masiri ta ãhraa. I mũmũ maja masa erã gamero erã masiri iro dopa árĩbeaa i mũare gũa buheri. I yebare dorerã ya masiri sã árĩbeaa. Erã masiri i mũmũ mera pehrero iiaa.

<sup>7</sup> Goãmũ ya masiripũre werea. Iribojegue i buherire ne masisũya mariyoro. Negohraguere mari ðaro arĩborore Goãmũ arĩ pepituhajamũripũ. Marire peamegue wabonirãre ĩgũ tauborore, ĩgũ mera mari arĩboro sãre “Masare eropa ta iigũra,” arĩ pepiyurũ.

<sup>8</sup> Īḡu masare ðaro arĩ pepirare i ɯmure dor-erã masibiriñuma. Irire ðaro masirã, mari Opure Goãmũ magu gohrare crusague pabia wejẽbiriboañuma erã.

<sup>9</sup> Erã eropa masibirirare Goãmũ yare erã gojarapũgue õpa ãhraa:

Árĩpehrerã Goãmure mahirã ya árĩburire Goãmũ ðaro amubasayutuhapũ. Iri ĩḡu amubasarapure masare masima masiya mara. Ne gajino iro dopa ĩaya mara irire, arãa Goãmũ yare erã gojarapũgue.

<sup>10</sup> Iri eropa arĩquerecũ ta Espiritu Santopũ Goãmũ yare, masisũya marirare masicũ iimi marire. Árĩpehreri Goãmũ yare ĩḡu pepira sãre Espiritu Santo masipehomi. Eropa masigũ ĩḡu marire irire masicũ iimi.

<sup>11</sup> Ne gajirãpũ masũ ĩḡu pepirire masibeama. Masupũ ĩḡu seyaro ĩḡu guñarigue ĩḡu pepirire masimi. Eropa ta masa Goãmũ ĩḡu pepirire ne masibeama. Espiritu Santo dihta ĩḡu pepirire masimi.

<sup>12</sup> Eropirã mari Jesu yarã árĩrã erã i ɯmũ majarã Jesu yarã árĩbirã erã pepiro dopa pepibea. Goãmũ ĩḡu Espiriture ohomi maripure ĩḡu pepiro dopa mari pepiburire. ĩḡu marire ðaro ĩḡu orare masicũ iimi Espiritu Santopũ.

<sup>13</sup> Eropirã Goãmũ yare mũare buherã, masa ya masiri mera gũa gamero buhebeaa gũa. Espiritu Santo ĩḡu gamero dopa ĩḡu gũare wereniguidoreripure mũare buhea. Eropa buherã Espiritu Santo gamero dopa Goãmũ yare ðaro buhea gũa ĩḡu yarãre.



14 Espíritu Santore opabirãpũ irire Espíritu Santo yare erãre buhecũ, “Pee masibirã wereniguri ãhraa,” arĩma erã. Eropirã gamebeama. Espíritu Santo ĩgũ itamuro mariro ĩgũ yare masima masiya mara masare. Eropirã erã ĩgũ yare ne masibeama.

15 Espíritu Santore oparãpũ Goãmũ yare õaro masima. Gajirãpũ erãre “Pee masibirã ãhrima,” arĩmasibeama Espíritu Santore oparãre.

16 Õpa arãa Goãmũ yare erã gojarapũgue: “Ne yujugũ ĩgũ gamero mera mari Opũ ĩgũ guñarire masigũ ne marimi. Eropirã ĩgũre masa ne buhemasibeama,” arãa ĩgũ yare erã gojarapũgue. Maripũ Cristo yarã árĩrã, Cristo iro dopa masia.

### 3

*Jesu yarã yujuro mera Goãmũ mohme corerã ãhrima, arĩ gojañumi Pablo*

1-2 Yũ acawererã, mũare buhegũ Espíritu Santore õaro yũhrirãre yũ buhediro dopa buhemasibiribũ mũapũre. Mũa pepiri Espíritu Santo opabirã pepiro dopa árĩbũ. Cristo yarã mũa árĩquererã ta ĩgũre õaro yũhrirã árĩbirã majirãgã erã pee masibiro dopa ta Goãmũ yare õaro pee masibiribũ mũapũ dohpa. Eropa mũa pee masibiricũ ĩagũ Goãmũ yare õarire buhenemasibiribũ mũare. Eropigũ majirãgãre apĩco dihtare mari oro dopa ta diasabiriri buheri dihtare buhebũ daja mũare. Dohpague sãre mũararo ta masinibea dohpa mũa.

<sup>3</sup> Õpa iirã iiaa mũa Espíritu Santore yuhribirã. Mũarũ mũa mera majarãre ïadiabirã, erã gajinore opacũ ïhaturirã, mũa basi yujurãyeri cururi Yũ acawererã, mũare buhegũ Edũca warirã iiaa. Eropirã Espíritu Santore opabirã Cristore gamebirã iro dopa iirã iiaa mũa. Eropirã Goãmũ yare õaro peebeaa mũa.

<sup>4</sup> Õpa ãhrayoro mũa. “Pablo ya curu majarã ãhraa gũa,” arãyoro mũa yujurãyeri. Eropirã gajirã mũa mera majarãpũ “Apolo ya curu majarã ãhraa gũa tamera,” arãyoro mũa. Eropa arĩ dũyatorã Espíritu Santore opabirã iro dopa arĩ wereniguia mũa.

<sup>5</sup> ¿Yũhũ Pablo, Apolo mera duhpimorã ãhriri gũa mũa pepicũ? Áríbeaa. Goãmũre mohme corerã ãhraa gũa. Gũare ïgũ iidorero dopa iimorã ãhraa. Eropirã gũa mũare buhecũ peerã Jesucristore umupeonũgabũ mũa.

<sup>6</sup> Õari buherire buherã pohegue mohme corerã iro dopa ãhrima mari werenigui queori mera buhecũ. Pohegue ïgũ otemũhtadiro dopa ta yũhũ mũare Goãmũ yare buhemũhtabũ. Eropigũ gajigũ ïgũ pohere ïhadiburo dopa ta Apolopũ yũ pũhrũ mũare buhenũrusiami. Gũa eropa buhequerecũ ta pohe maja yucũre iri bugacũ ïgũ iidiro dopa ta Goãmũpũ mũare ïgũ yare masinemocũ iimi.

<sup>7</sup> Eropigũ yũ buhemũhtadi arĩqueregũ ta bu arĩgũ ãhraa. Eropigũ Apolo yũ pũhrũ buhenemodi sã bu arĩgũ ta ãhrimi. Goãmũ tamera õagũ ãhrimi. ïgũpũ mũare ïgũ yarã arĩcũ ïgũre masinemocũ iimi. Eropirã Goãmũpũre

umupeoro gahmea mware.

<sup>8</sup> Otemuhtagu puhru pohere ihadibugū yujuro mera mohme corerā āhrima erā. Eropirā erā nucu erā mohmediropē ta wajatama erā. Eropa ta āhraa guā Apolo mera.

<sup>9</sup> Eropirā guā Goāmū yare mohme corerā āhraa. Eropa guā mohme corerā Apolo yū mera majagu āhrimi. Mwarū Goāmū ya pohe iro dopa ta āhraa. Mwa eropa arīcū Goāmū ya pohe iri maja yucure īgu buganemocū iidiro dopa ta mware īgu yare masinemocū iimi īgu.

Eropigu Goāmū mware īgu yarāre ōarā arīcū iigu iimi. Eropirā mwa Goāmū mohmeri wihi iro dopa āhraa mwa gaji werenigui queori mera werediācū.

<sup>10</sup> Yure Goāmū īgu itamuro mera yurū wihi iimehregū borari īgu nugumuhtaro dopa ta Jesucristo yare mware buhemuhtabū. Eropigu iri weca gajigu īgu peoturia mūriaro dopa ta gajigu yū puhru buhenemogu iimi. Eropa buhenemogu ōaro guhyadiaro mera Goāmū yare buhero gahmea īgure. Queoro buhero gahmea.

<sup>11</sup> Wihire iirā borarire nugumuhtabiricū wihi iima masiya mara. Eropa ta Cristore buhebiricū īgu yarā wacū iima masiya mara. Cristo mari ya dipuwajare sīribasarare mware buhetuhajabū. Eropirā mwa Jesucristore umupeorā Goāmū yarā watuhajabū. Mwa eropa arīrāguere gaji buherire buhema masiya mara mwa Goāmū yarā wamorāre.

<sup>12-15</sup> Goāmū yarāre buhenemorā āhrima. Erā watope gajirā queoro buhema. Gajirā queoro buhebeamā. Queoro buheri oro, plata, waja

pagari utāyeri iro dopa āhraa. Queoro árībiriri buheripũ yucũ, taa, ñaira pũri iro dopa āhraa. I umũ pehrerinari árīcũ Jesucristo dujarigu mari buhera queoro árīcũ ĩhmugũcumi. Mari buherare soeñagũ iro dopa ta queoro árīcũ ĩhmugũcumi. Eropiro oro, plata, waja pagari utāyeri soecũ ũjubiro dopa ta mari buhera queoro ta árīro dujaroca ĩgu ĩacũ. Eropa mari queoro buhenirã mari árīcũ ðaro mari buhera waja wajayegũcumi. Eropa ta yucũ, taa, ñaira pũri soecũ ũjupehrero dopa ta mari buhera queoro árībiri pehreroca ĩgu ĩacũ. Eropigu queoro buhebirinirã mari árīcũ ĩagũ marire wajayesome. Erã eropa árīrã erã wajatabiri-querecũ Goãmũ erãpũre taugũcumi. Eropirã eropa queoro ðaro buhebirinirã merogã mera tarirãcoma. Eropirã wihi ũjũrisubu tariro dopa tarirãcoma.

**16** Mũa Jesu yarã mera Espĩritu Santopũ mũa mera āhrimi. Eropirã mũa Goãmũ ya wihi iro dopa āhraa. ¿Irire masibeari mũa?

**17** Eropirã mũa Goãmũ ya wihi árīro dopa árīrã ĩgu yarã gohra āhraa. Eropigu ĩgu yarãre yujugũ ĩgu goroweocũ Goãmũ peamegue dedeogũcumi ĩgupũre.

**18** Irire ðaro masique mũa. Mũa basi pee wisibiricãque. I umũ maja buherire opagũ “Masitarinũgagũ āhraa,” arĩ pepibocumi. Eropa arĩ pepigu mũa mera majagũ árīgu, “Yũhũ Goãmũ masiri mariro pee masibigu āhraa,” arĩ pepiporo ĩgu. ĩgu eropa arĩ pepigu diaye ta ðaro masigu wagũcumi.

19 I umu maja masa erã gamero erã basi masiri “Bu gohra ta ãhraa,” arĩ pepimi Goãmũ. Eropa ta werenemoa Goãmũ yare erã gojarapũ. Ōpa arĩ gojara ãhraa: “Erã gamero masirã erã pepiri mera ‘Ōpa iirãra,’ erã arĩrare gajiropa wacũ Goãmũ iimi,” arãa Goãmũ yare erã gojarapũ.

20 Eropi gajipũgue ōpa arãa daja: “Masa erã gamero ‘Masipehorã ãhraa,’ erã arĩ pepiri duhpiburi árĩbircũ masimi mari Opũ Goãmupũ,” arãa Goãmũ yare erã gojarapũgue.

21-22 Eropirã “Pablo ya curu majarã ãhraa gũa,” arĩrã, “Apolo ya curu majarã ãhraa gũa,” arĩrã, “Pedro ya curu majarã ãhraa gũa,” arĩrã arĩbircãque mũa pare. Gũa árĩpehrerã mũa ya árĩburire iirã dihta ãhraa. Goãmũ árĩpehreri mũa ya árĩburire otuhajadigũ árĩmi. Īgũ ihacũnugurare mũa ya árĩburire odigũ árĩmi mũare. Mũare ojocaricũ iimi mũa ya árĩburire. Eropigũ sĩricũ sãre iigucumi mũa ya árĩburire. Dohpague mũa árĩrere, pũhrũgue mũa árĩburi sãre ogucumi. Eropirã árĩpehreri mera ãhraa.

23 Eropirã mũapu Cristo yarã ãhraa ĩgũ ya árĩburire iimorã. Eropigũ Cristopũ Goãmũ yagũ ãhrimi ĩgũ ya árĩburire iibu. Eropirã “Gũa tamera Pablo ya curu majarã ãhraa,” arĩbircãque mũa pare.

## 4

*Cristo ĩgũ yare ĩgũ buhedoregũ ĩgũ apinirã erã mohmerire werepu Pablo*

1 Ōpa arĩ pepique mũa yure, Apolo sãre: Eropa ta erã Cristore mohme corerã ãhrima. Eropirã

“Masa erã masibirirare Goãmũ yare buhedore ãgũ apinirã ãhrama,” arĩ pepique mũa.

<sup>2</sup> Yujugũ ãgũ ya árĩburire iidore apinirãre ãgũ gamero dopa ta ii corero gahmea erãre. Yũ sãre eropa ta ii corero gahmea Cristo ãgũ gamerire.

<sup>3</sup> Mũa yũre werewũaquerecũ eropa pepicãa yũhũ. Gajirã masa erã yũre werewũaacũ sãre eropa pepicãa yũhũ. Yũ iirire ãarã “I õari ãhraa. I ñeri ãhraa,” arĩ beyemasibea mũa yũre. Yũ basi árĩqueregũ yũ iirire õaro beyemasipehobeaa yũ sã.

<sup>4</sup> Õpa arĩ pepia yũhũ. “Mari Opũ yũre ãgũ apidiro dopa ãgũ gamerire ipehorabũ yũhũ,” arĩ pepia yũhũ. Yũ õpa arĩ pepiquerecũ ta yũ arĩ pepiri diaye árĩbiriboca. Mari Opũ Cristo dihta yũ iiricũrĩre ãagũ õaro masimi yũ ãgũ yare õaro iicũ.

<sup>5</sup> Eropirã mari Opũ ãgũ dujariboro core masare erã iirare arĩ werewũaabiricãque. ãgũ dujarigũ masa erã iirare iribojegue gajirã erã masibirirare Cristo deyoro moagũcumi. Eropirã mari iidiarare ãgũ masicũ iigũcumi gajirã masare. Irisubu ta mari nũcũre ãgũ yare mari iidiro dopa ta “Irire õaro iiabũ,” arĩgũcumi Goãmũ marire.

<sup>6</sup> Yũ acawererã, yũhũ Apolo mera gũa árĩricũrĩre werebũ yũhũ mũare buhebu. Eropa werebũ Goãmũ ãgũ yare ãgũ gojarapũ ãgũ arĩdirore mũa tarinũgabiriboro dopa. Eropa tarinũgabitã árĩrã mũa yujurãyerire umupeobiricãque. Mũa eropa iibirã arĩtarinũgadiarã iiaa.

<sup>7</sup> Mũa eropa iibiriboro dopa gũa iirare werebũ mũare. Mũa eropa tarinũgadiaquererã mũapũ

gajirã tauro ðarã árĩbeaa mũa. Goãmũ mũaare ãũ ora dihtare opaa mũa. Eropirã ãũ mũaare masicũ iira dihtare masia mũa. ¿Mũa gamero oparã, mũa bocatũuro masirã árĩbiriqwererã ta, duhpirã “Masipehorã ãhraa,” arĩri mũa? Eropa arĩrã “Goãmũ gũare obirimi. Eropigũ gũare masicũ iibirimi,” arĩdiarã dopa ta iiaa mũa.

<sup>8</sup> Mũapũ “Árĩpehrerire opaa gũa. Gũare ñehe duhyabeaa,” arĩraa mũa. Eropirã gũa mũa pohro árĩbircũ ðpa arĩ pepiraa: “Oparã iro dopa masirã ãhraa gũa,” arĩ pepiraa mũa. Diaye ta oparã iro dopa mũa masipehorã árĩcũ mũaare ðatariaboya. Mũa eropa árĩcũ mũa mera gũa sã oparã iro dopa masipehorã árĩboya. “Masirã ãhraa gũa,” arĩ pepirã, ¿ðaro arĩ pepiri mũa? Õaro pepibeaa yũ ãacũ.

<sup>9</sup> Õpa arĩ pepia yũ tamera: Goãmũ gũaare Jesu ãũ yare buhedore apinirã doca maja curu apimi gũaare. I yeba majarã masa, anyua sã gũa ñero taricũ gũaare ãamurima eropa wacũ.

<sup>10</sup> Cristo yare gũa buhecũ ãarã, “Pee masibirã ãhrima,” arĩma masa gũaare. ¿Mũapũ Cristo yare ðaro pee masirã ãhriri mũa? “Turabirã, bu arĩrã ãhrima,” arĩma masa gũaare. ¿Mũapũ ðaro turarã ãhriri mũa? Mũa basire umupeoa. Gũapũre masa ne umupeobeama.

<sup>11</sup> Gũapũ dohpaguere ñero tarirã, oaboarã, ñemesiburã, ñeri suhricurã, wiri moorã ãhraa. Eropirã gũaare gajirã umupeobirã, gũaare pabiramurima.

<sup>12</sup> Eropirã gũa buheniguiqwererã teboricurã arĩrã gũa árĩburi majare gũa baburi sãre

mohmea. Eropirã gajirã guare erã ñero wereniguiquerecũ ta guapu Goãmure òaro erã árĩburire serẽbasaa. Eropa iirã gajirã guare ñero iimorã erã nuruquerecũ ta eropa pepicãa guu.

<sup>13</sup> Eropirã “Ñero iirã àhrima,” guare erã werewuaquerecũ ta guapu erãre òaro wereniguia erã òaro árĩburire. Eropirã erã burigã dohoma guare. Iribojegue eropa iinugama. Dohpague sãre muraro ta iima guare.

<sup>14-15</sup> Muare òari buherire buhemuhtabu. Eropa buhecũ mua peecũ Jesucristo muare igu yarã wacũ iidi árĩmi. Eropa muare buhedigu mua pagu iro dopa ta wahabu yuhu. Bajarã muare Cristo yare buherã erã árĩquerecũ ta muare buhemuhtagu yuhu yujugu ta àhraa. Eropigu yuhu yujugu ta mua pagu iro dopa àhraa. Eropigu muare guhyasĩricũ iibu ire gojagu iibea. Yu porã yu mahirãre muare werebu ire gojaa yuhu.

<sup>16</sup> Eropigu ire turaro muare werebu iiaa yuhu. Yure ìhacũque mua sã.

<sup>17</sup> Mua eropa iicũ gamegu mua pohro Timoteore obeogu iiaa. Igu yu magu iro dopa yu mahigu mari Opu Jesucristo yagu àhrimi. Eropigu Cristo gamero dopa iiniguigu àhrimi igu. Timoteo mua pohro ejagu Jesucristo yare yu iidiro dopa muare guñacũ iigucumi mua sã eropa iiboro dopa. Jesu yarã pohrogue noho wagu Jesucristo yare erã iiburire buheniguicãa.

<sup>18</sup> Yujurãyeri mua mera majarã oparã árĩdiarã òpa arãñorã: “Pablo mari pohroguere arisome,” arĩ pepirañorã erã.



19 Goãmũ gamecũ mũa pohrogue dohparagã ta ejagũca. Eropa ejagũ erã oparã árĩdiarã mũa mera majarã erã eropa arĩrare ãagũra. Eropigũ erã Goãmũ turari opacũ ãagũra yũhũ.

20 Goãmũ mari Opũ ãhrimi. Mari arĩ were-tarinũgaquerecũ ta ãgũ yare mari iibiricũ mari wereniguri duhpiri arĩbeaa. ãgũ turari mera ãgũ gamero dopa iicũ gahmemi.

21 ¿Mũa pohrogue mũa ya dipuwaja dipuwaja moagũ yũ wacũ gahmeri mũa yũre? ¿O mũa õaro iira waja mucubiriri mera waro gahmeri mũa yũre?

## 5

### *Corinto majarã erã ñeri iirare werepũ Pablo*

1 Gajirã õpa arĩ querecũma gũare: Yujugũ mũa mera majagũ ãgũ buamore ta marapocũ waĩcũmi. Eropa ta arĩ werema masa gũare. Erã eroparĩcũ peemaria wahabũ. Gajirãpũ Goãmũre masibirã arĩquereerã erãpũ eropa iirã arĩbeama.

2 Mũa mera majagũ ãgũ eropa iiquerecũ ta mũapũ “Õatariarã ãhraa gũa,” arĩ pepiraa. ¿Duhpirã ãgũ eropa ñeri iirare masiquereerã ta gũhyasĩrisãbeari mũa ãgũre? Eropa ñero iigũre mũa Jesu yarã mera majagũre cóãcãque mũa.

3-4 Yũhũ mũa mera arĩbiriqueregũ ta yũ guñari mera mũa mera arĩgũ iro dopa ãhraa yũhũ. Eropigũ mũa mera arĩgũ yũ arĩbodiropã dopa ta ñero iigũre ãgũ eropa ñero iira dipuwaja, dipuwaja moadoretuhaa yũhũ. Jesucristo ãgũ dorero mera ta eropa iidorea. Eropa mũa Jesu

yarã gamenererã yu guñabeori merague yuhũ mũa mera árĩcũ, mari Opũ Jesu ïgu turari mera

<sup>5</sup> ïgũre ñero iigũre cóãque. Watĩ mera ïgu ñero tariborore apique. Eropa ta cóãque ïgũre ïgu ñero tariri mera ñerire ïgu ɯaribejarire ïgu gohrotoboro dopa. Mari Opũ Jesucristo ïgu dujaririnũ ñero iidigu mũru Jesu mera ïgu ðaro tariboro dopa dohpaguere ïgũre eropa apinique, arãa yuhũ.

<sup>6</sup> “Óaro ãhraa guã,” mũa arĩquererã ta ñero iirã iica mũa. Ñero iigu ïgu ñerire mũa eropa ïacãrã, árĩpehreri ñeri mũare ii ïhmucũ árĩpehrerã ñero iirãca. Eropiro árĩpehreri ñeri sehya wa mũa árĩroque. Panre buɣacũ iiri pohga ðaro seyanugajaro dopa ta iri ñeri ðaro seyaroca mũaguere. ¿Irire masibeari mũa?

<sup>7</sup> Yu acawererã judio masa Pascua árĩcũ ovejare wejẽmũrima erã ñeri iira dipuwajare Goãmũre cãdijidorerã. Oveja sĩridiro dopa ta Cristo mari ñeri dipuwajare sĩribasadi árĩmi. ïgu eropa sĩribasarañe mera mũa ñerire cóãnirã ãhraa. Irire guñarã mũapũ ñero iigũre mũa mera majagũre cóãque ñeri mũa watope mariboro dopa.

<sup>8</sup> Iribojegue ñerire ïhacũ iinirã árĩribũ mari. Eropirã dohpaguere mari ñerire cóãnirã árĩrã mari ñerire ɯaribejaro mariro, ñero iiro mariro árĩrã. Iribojegue mari ñerire iimũridiro dopa ta iibircãrã. Eropirã diaye maja ðaro wereniguiiri mera, ðaro iiricũri mera árĩrã pare.

<sup>9</sup> Mũare yu gojabeorapũre nome mera ñero iirã, ñerire iimajĩñajarã mera ne

wapicudorebiriribũ.

<sup>10</sup> Eropa arĩgu “Jesu yarã árĩbirã mera árĩbircãque,” arĩbiribũ. Eropigu “Nome mera ñero iirã mera, gajinore turaro gamenemocãrã mera, yajaricũrã mera, goãmarã wéanirãre umupeorã mera árĩbita,” arĩbeaa. I yebare eropa árĩrã mariro Jesure gamebirã mariro mari dihta árĩmasibeaa. Árĩpehrerogue ãhrima erãpũ ta.

<sup>11</sup> Eropigu mũare gojabeogu õpa arĩ doreribũ: “Mũa mera majarã Jesu yarãpũ erãpũ ñerire iicũ ñha erãpũre wapicubircãque,” arĩ goja doreribũ. Eropirã mũa mera majagu “Jesu yagu ãhraa,” ñgu arĩgu árĩqueregu ta nome mera ñero iigu, gajinore turaro gamenemogu, goãmarã wéanirãre umupeogu, ñero quere moa coregu, merericũgu, yajaricũgu ñgu árĩcũ ñgũpũre wapicubircãque. Eropirã eropa iigu mera ne babircãque.

<sup>12-13</sup> Jesu yarã árĩbirãpũre Goãmũpũ dipuwaja moagũcumi. Eropigu Jesu yarã árĩbirãre erã ñero iiri dipuwaja moadoregu árĩbeaa yũhũ. Eropa iibircãro gahmea yũre. Eropa arĩquerecũ ta mari Jesu yarã watope mari ñero iira dipuwajare moaro gahmea mari basire. Eropirã mũa Jesu yarãpũ mũa mera gamenererã mũa basi mũa iirare ñha masiro gahmea mũare. Eropirã yujugu mũa mera majagu ñgu ñero iicũ ñarã ñgũre dipuwaja moadorero gahmea mũare. Eropirã Goãmũ yare gojarapũgue arĩdiro dopa mũapũ mũa mera majagũre ñero iigũre dipuwaja moaro dopa iirã ñgũre cóãque.

## 6

*Jesu yarãre weresãrare werepũ Pablu*

<sup>1</sup> ¿Mũa basi game dũyatorire duhpirã Jesu yarã árĩbirã pohrogue amudorerã wahari mũa? Jesu yarãre mũa mera majarãre weresãdiarã gajirã Jesu yarãre irire werero gahmea mũare. Eropirã Jesu yarãpũ amubasaporo.

<sup>2</sup> Pehrerinũ árĩcũ mari Jesu yarãpũ mari árĩpehrerã masa erã iirare beyerãca. ¿Irire masibeari mũa? Eropirã pehrerinũ árĩcũ masa árĩpehrerãre beyemorã árĩrã, dohpague sãre amumasia mari. Eropirã dohpague gajiropa wacũ sãre amumasia mari.

<sup>3</sup> Anyua erã iira sãre beyerãca mari. ¿Irire masibeari mũa? Mari eropa anyuare beyemorã árĩrã diaye ta dohpague sãre Jesu yarã erã iirare ïarã beyemasica mari.

<sup>4</sup> ¿Eropirã duhpirã mũa mera majarãre weresãdiarã Jesure gamebirã, “Bu árĩrã” mũa arĩrã pohrogue amudorerã wahari mũa?

<sup>5</sup> Ire arĩgu iiaa mũa guhyasiuro mũa tari-borore. Mũa dũyatorire werebu òaro masigu árĩcumĩ mũa watopere, yũ arãa.

<sup>6</sup> Ĩgu eropa árĩquerecũ ta mũa mera majagu Jesu yagu gajigu ĩgu acaweregure weresãdiagũ Jesu yarã árĩbirãre beyedoregu wahami.

<sup>7</sup> Masare beyegu pohrogue mũa acawererãre weresãrã Goãmũ gameripũre tarinũgarã iiaa mũa. Gajigu mũa mera majagu mũare ñero ĩgu iicũ eropa ïacãboaya mũa. Jesu yarã árĩbirãre mũa weresãbiriborore mũa acaweregure mũare ĩgu ñero iirare mũa eropa ïacãcũ

õatariaboaya. Jesu yagu mũare ãgu yajacũ ãgure mũa weresãboro core ãgu mũare yajarare mũa eropa ãacãcũ õaboaya.

<sup>8</sup> Mũa eropiibeaa. Gajirãre ñero iirã ãhraa mũa sã. Yajarã ta ãhraa mũa sã. Jesu yarã mũa acawererã erã árĩquerecũ ta erãre ñero iirã, yajarã iiaa mũa.

<sup>9</sup> Eropa iirã Goãmũ ãgu opu árĩroguere wamasibeama. ¿Irire masibeari mũa? Pee wisibiricãque mũa. Õpa iirã Goãmũ pohroguere wasome: Gajirã nome mera ñero iirã, goãmarã wéanirãre umupeorã, gajigu marapore marapocurã, gajigu marapu mera ñero iirã nome, uma seyaro erã dũpuri mera ñero iirã, nome sã eropa ta iirã,

<sup>10</sup> yajarã, gajinore turaro gamenemorã, merericurã, gajirã masare ñero quere moa corerã, gũyari mera yajarã ne Goãmũ ãgu opu árĩroguere wamasibeama.

<sup>11</sup> Iribojeguere mũa yujurãyeri eropa iirã árĩyoro. Eropa iinirã mũa árĩquerecũ ta dohpagueere mũa ñero iirare cóãtuhami Jesucristopũ. Eropa ãgu taunirã mũa árĩcũ ãgu yarã árĩmorã iimi Goãmũ mũare. Eropa iigu “Õarã ãhrima,” arĩ ãhami ãgu mũare. Eropa ta iimi mũare mari Opu Jesucristo mera, Espĩritu Santo mera.

*Mari dũpu õarire iiburi dũpu árĩro iiaa, arĩ gojañumi Pablo*

<sup>12</sup> “ ‘Goãmũ iidorebirira árĩpehreri iimasiri ãhraa yũre,’ arĩmi Pablo,” arãa mũa yũre. Yũ iimasipehoqueregu ta, yũ iiri yũre gajirã sãre itamubiricũ ãha irire iibeaa. Eropa ta árĩpehreri

iimasiri āhraa yure. Eropa iimasiqueregu ta yujuyerisuburi irire eropa iipoga duhumasibiri-boca, arīgu irire iisome yuhā.

13 Mari bari mari paru maja árīburi ta āhraa. Eropiro “Mari paru bari dicūburiduru paru āhraa,” arāa mua yujurāyeri. Mua eropa arīquerecū ta pūhrū Goāmūpū mari barire mari paru sāre iri pehrea wacū iigūcumī. Eropirā mua yujurāyeri “Mari dūpūpū mari ūaribejari iiburi dūpū āhraa,” arīraa mua. Eropa árībeaa. Mari dūpū ūaribejari iiburi dūpū árībeaa. Mari dūpūpū mari Opū ya árīburi iiburi dūpū āhraa. Eropigu mari Opūpū mari mera āhrimi mari īgu yare ōaro iiboro dopa.

14 Eropigu Goāmū īgu turari mera mari Opū Cristo dūpū mūrarore masupū. Eropa īgure masudiro dopa ta mari dūpū sāre masugūcumī īgu.

15 ¿Mua ya dūpū Cristo ya dūpū árīri iro dopa árīcū masibeari mua? ¿Cristo ya dūpū árīri iro dopa árīrā nomeo ñero iiricūgo mera mari árīcū ōhari mua pepicū? Ōabirigohracāca.

16 Ñego mera yujugu igo mera árīcū īgu dūpūpū igo ya dūpū mera árīro yuju dūpū iro dopa ta āhraa. ¿Irire masibeari mua? Eropa arī gojara āhraa Goāmū yare erā gojarapūgue. Ōpa arāa: “Nomeo ūmū mera árīrā perā arīquereerā yuju dūpū iro dopa wahama,” arī gojamūriñumi.

17 Mari Opū īgu yarā mera āhrimi. Eropigu yujugu īgu mari Opū mera perā arīquereerā yujugu iro dopa āhrima erā guñari mera.

18 Eropirā nome mera ñero iirire, ūma

mera ñero iirire ɯaribejabiricãque. Irire mũa ɯaribejabiriboro dopa ta irire duhrigã waque. Gaji ñerire mari iira mari dɯpɯre mari goroweobea. Nomeo mera ñero iigɯɯ ïɯu dɯpɯre ñetariaro goroweomi.

<sup>19</sup> Espíritu Santore marire ohomi Goãmɯ. Eropigɯ mari dɯpɯ mera wihicɯmi Espíritu Santo. ¿Iirire masibeari mũa? Eropirã mũa dɯpɯ mũa ya dɯpɯ gohra árĩbeaa. Goãmɯ ya dɯpɯ ãhraa.

<sup>20</sup> Mũa ïɯu yarã árĩmorãre mũa ñeri dipuware wajayedigɯ árĩmi Cristo. Eropirã ïɯu yarã árĩrã mũa dɯpɯ mera Goãmɯ ïɯu gamero dopa ta iique. Eropa iirã Goãmɯre umupeorã iiaa mũa. Eropirã gajirã sãre ïɯure umupeocũ iirã iiaa.

## 7

### *Mojoto diririre werepɯ Pablo*

<sup>1</sup> Dohpaguere mũa ɯare serẽpi gojarare ɯɯ sã mɯare ɯɯhrigura. Masɯ marapo maricũ sãre õhaa ɯɯ ïacũ.

<sup>2</sup> Iri eropa árĩquerecũ ta ero mũa árĩro baja ɯaribejari ãhraa. Eropirã ɯma erã nɯcɯ nome marapocɯporo gajirã nome mera erã ñero iibiriboro dopa. Eropirã nome sã erã nɯcɯ marapocɯporo gajirã ɯma mera erã ñero iibiriboro dopa.

<sup>3</sup> Eropigɯ marapocɯɯure ïɯu marapore õaro iiro gahmea. Igo marapɯ sãre eropa ta iiro gahmea.

<sup>4</sup> Marapocɯgo igo dɯpɯ igo ya dihta árĩbeaa. Igo marapɯ ya sã ãhraa ïɯu ïhadiburo dopa. Igo

marapu sãre ãgu dupu ãgu ya dihta árĩbeaa. Ìgu marapo ya sã àhraa igo ìhadiburo dopa ta.

<sup>5</sup> Mũa perã árĩburire “Ìbìricãrã,” arĩbita. Gajisubu mũa perã Goãmũ mera mũa wereniguidiarã “Ì nũcũ nũri duhunirã dohpa, Goãmũ mera wereniguirã dohpa,” yujuro mera eropa arĩrã duhumasia mũa. Mũa eropa duhura pũhrũgã mũa dipaturi mũa eropa árĩniguidiro dopa ta árĩque daja watĩ ñero mũaare iidorebiriboro dopa. “Gajirã mera ñero iiboca,” arĩrã mũa basi duhubita. Mũa árĩmũhtadiro dopa ta árĩniguicãque daja.

<sup>6</sup> Ire mũaare dohpague yũ arĩrare arĩgu mũaare dore gohrari mera dorebeaa. Eropã weregu iiaa mũa iiburire mũa masima õaro.

<sup>7</sup> “Uma marapocũporo,” arĩquerecũ, árĩpehrerã mũa yũ iro dopa ta marapo marirã mũa árĩcũ õaboaya yũre. Mũa eropa árĩcũ gamequerecũ ta Goãmũ mari árĩpehrerãre yujuropa iimasiburire apibeami. Yujurãyerire marapocũmasiburire marapũcũmasiburire apimi Goãmũ. Eropigu ãgu gajirãpũre marapocũmasibiriburire marapũcũmasibiriburire apimi.

<sup>8</sup> Eropigu marapo marirãre, marapu marirãre, wapeweyarãre õpa arãa: Marapo marirã, marapu marirã mũa árĩmasirã, yũ árĩro dopa árĩcũ õhaa.

<sup>9</sup> Eropã árĩmasibirã turaro nomere gah-mema. Irire turaro ùaribejarã diaye ta marapocũcãporo. Nome sã marapũcũporo. Mũa eropa ùaribejarã mũa marapocũcũ õapũricãa. Eropiro marapũcũcũ sãre õapũricãa.



10 Mũa marapocurãre, marapucurã nomere òpa dorea: Yaha doreri gohra árĩbeaa i. Mari Opũ Cristo ire doredi árĩmi. Mũa nomerũ mũa marapũ sumarãre cóãbircãque.

11 Mũa marapũ sumarãre cóãrã, marapũ marirã dujaque. Dipaturi mũa marapũ árĩdigũ mera ahmu òaro árĩbircũ daja marapũ marirã dujaque. Eropirã mũa ũa sã mũa marasã nomere cóãbircãque.

12 Eropigũ mũa sãre gajirã sãre òpa arãa yũhũ. Mari Opũ ãgũ dorediro árĩbeaa i. Yũhũ ãgũ apidigũpũ òpa arãa mũare: Yujurãyeri mũa mera majarã Jesu yarãpũ Jesure umupeobirã nomere marapocurã ãhraa. Eropigũ òpa arĩ werea mũare: Mũa marasã nome mũa mera erã dujadiacũ erã nomere cóãbircãque mũarũ.

13 Eropirã yujurãyeri mũa mera majarã nome Jesu yarã nome Jesure umupeobirã mera marapucurã nome ãhraa. Mũa marapũ sumarã mũa mera erã dujadiacũ erãre cóãbircãque.

14 Mũa marapũ sumarã Jesure umupeobirã erã árĩquerecũ ta Jesu yarã nomere erã marapocucũ, Goãmũ òarã ũa iro dopa ãhami erãre. Eropirã mũa ũamarũ Jesu yarã mũa árĩcũ mũa marasã nome Jesure umupeobirã nome árĩbocoma. Erã eropa árĩquerecũ ta mũa mera erã nome marapucucũ Goãmũ òarã nome iro dopa ãhami erãre. ãgũ eropa ãabircũ mũa porã Jesure umupeobirã porã iro dopa árĩboñuma. Eropigũ mũa porã sãre òarã iro dopa ãhami Goãmũ.

15 Eropirã mũa ũamarũre mũa marasã nome Jesure umupeobirã nome erãpũ mũare cóãcũ

õaroca. Mũa nome sãre mũa marapũ sũmarã Jesure umupeobirã erãpũ mũaare cóãcũ õaroca. Mari õaro dujacũ gahmemi Goãmũ. Eropirã erã eropa cóãdiacũ “Yũ mera dujaque,” erãre arĩdorebeami Goãmũ. Eropirã mũa erã marasã nome erã marapũ sũmarã árĩbeaa pare.

16 Mũa ũa mũa marasã nome mũa mera dujaquerecũ erã peamegue wabiriborore Jesure umupeocũ iimasibiriboca. Mũa nome sã eropa ta Jesucristore umupeocũ iimasibiriboca mũa marapũ sũmarãre. Eropirã erã mũaare cóãdiacũ õaroca.

17 Õpa ta iiro gahmea mũaare: Árĩpehrerã mũa mari Opũ Cristo mũaare ãgũ árĩdorero dopa ta árĩque. Goãmũ mũaare ãgũ apirare iique mũa. Irire árĩpehro Jesu yarã gamenererãre eropa doreniguica yũhũ.

18 Jesu yarã mũa árĩboro core circuncisión iinirã gasiro mero wiri aĩnirã árĩrã eropa ta dujaque. Eropirã Jesu yarã mũa árĩboro core gasiro merogã wiri aĩbirinirã árĩrã mũa árĩro dopa ta dujaque.

19 Dohpaguere gasiro mero wiri aĩnirã mũa árĩcũ duhpiburi árĩbeaa. Irire iibirinirã mũa árĩcũ sãre gajiropa wasome. Goãmũ dorerire mari iicũpũre iri tamera õhaa.

20 Eropirã Goãmũ Jesu yarã mũaare ãgũ aĩcũ irisubu mũa árĩmũhtadiro dopa ta dujaque.

21 Goãmũ mũaare Jesu yarã aĩboro core gajirã pohro majarã mũa árĩcũ õaroca. Eropa ta dujanique. Mũa Opũ ãgũ mũaare wiudiacũ wirique mũa. Mũa wiricũ sãre õaroca mũaare.

22 Õpa arĩ pepique mua: “Yũhu masu pohro majagu wiribiriqueregu ta dohpaguere Jesu yagu árĩgu, ĩgu wiudigu iro dopa ahraa ĩgu yare iiboro dopa,” arĩ pepique. Eropa ta gajirã Goãmũ Jesu yarãre aĩcũ masa pohro majarã mua árĩbiriquererã õpa arĩ pepique: “Dohpaguere Jesu pohro majagu ahraa yũhu,” arĩ pepique.

23 Mari ñeri dipuwajare mari ĩgu yarã árĩmorãre wajayetuhadi árĩmi Cristo. Eropirã ĩgu dorero dopa iique. Mua iiburire masa dorebircãporo.

24 Eropirã yũ acawererã, Jesu yarã árĩmorã Goãmũ mũare ĩgu aĩcũ irisubu mua árĩmũhtadiro dopa ta dujaque. Eropa dujarã Goãmũ mera õaro árĩque.

25 Dohpaguere marapo marirãre, marapũ marirã sãre werediaa mũare. Yũ wereburi mari Opũ weredoređiro gohra árĩbeaa. Eropa árĩbiriquerecũ yũhu ĩgu mojomoro ĩadigu, ĩgu itamudigu árĩcũ mua yũ wererire õaro mera peerãca. Õpa werea mũare.

26 Dohpaguere mari ñero tarirã iica. Eropirã mua árĩro dopa mua dujacũ õhaa yũre.

27 Eropirã marapũ marapocũrã, marapũcũrã sã eropa ta dujaque. Erãre cóãbircãque. Marapo marirã, marapũ marirã sã mua árĩrã eropa ta dujaque. Marapore o marapũre amabita.

28 Eropa yũhu mũare arĩquerecũ “Marapocũgũra,” arĩcũ gajiropa árĩbeaa mũare. Eropirã mua nome sãre marapũcũdiacũ õaroca. Õpa ahraa. Irisubu ñero taririsubu marapocũrã, marapũcũrã mũare teboricũburi dujaroca.

Eropigu mware eropa teboricuri arĩgu, marapo marirã, marapu marirã dujaque, arãa yũhũ.

29 Yũ acawererã, eropa arĩgu õpa arĩdiagu iiaa. Mari ñero tariboro merogã dũhyaa. Eropirã dohpaguere marapo marirã Goãmũ yare erã õaro mohmemasiro dopa ta, õaro mohmero gahmea marapocurã sãre. Eropirã marapucurã nome sãre eropa ta Goãmũ yare õaro mohmero gahmea.

30 Eropirã mari ñehamere orequererã Goãmũ yare mohmeboropure guñaro gahmea. Bosenu árĩrã mucubiriquererã Goãmũ yare mohmeboropure guñaro gahmea. Mari asũrare opaquererã irire guñabircãro gahmea. Goãmũ yare mohmero gahmea.

31 I yeba dohpague árĩro dopa pehrero iiaa. Eropirã i yeba majare iiburire wũaro guñabircãro gahmea.

32 Mũa gajinore wũaro mũa guñaricũcũ gamebeaa yũhũ. Marapo marigu Jesu yagu árĩgu mari Opũ Jesu yare igũ gamerire guñaniguimi.

33 Marapocũgũpũ Jesu yagu i yeba maja sãre igũ marapo gamerire guñami.

34 Eropigu peñe guñami. Marapu marigo mari Opũ Jesu yare iiburire guñaniguimo. Eropa guñago igo igo dũpũ, igo pepiri mera ta mari Opũ yago õaro árĩdiamo. Marapucũgorũ i yeba majare igo marapu gameripure burigã iidiamo.

35 Ire mware arĩgu iiaa mware itamubu. Teboricuri dorerire mware cãhmotadiabeaa, Eropa cãhmotadiabiriqueregũ ta õaro mũa iicũ gahmea. Eropigu baja guñaricũro mariro Jesu

mari Opu ĩgu gameri dihtare mua turaro iidiacũ gahmea yũhũ.

<sup>36</sup> Mua mera majagu ĩgu mago igo bũro wacũ ĩagu marapucudoreporo ĩgu igore. “Igore õaro iibeaa. Marapucuro gahmea igore,” arĩ pepigu ĩgu arĩdiro dopa ta nomesororo. Eropigo igo marapucumasimo. Eropa igore marapucudoregu ñero iibeami.

<sup>37</sup> Gajiguru ĩgu magore “Marapucubiricãporo,” arĩbocumi. Yujugu umure wereyudiro mariro, yujuñe ta pepigu arĩgu, “Igo marapucubiricãporo,” arĩgu õaro iimi.

<sup>38</sup> Eropigo ĩgu mago marapucudoredigo õaro wagocumo. ĩgu mago marapucudorebiridigopu gajigo tauro õaro wagocumo dohpaguere ñero taririsubu arĩcũ.

<sup>39</sup> Marapucugore igo marapu mera arĩniguicãdoremi Goãmũ. Igo marapu sĩrira puhru igo gajigu mera igo gamegu mera marapucumasimo daja. Jesure umupeogure marapucuro gahmea igore.

<sup>40</sup> Igo marapu marigo dujago tauro õaro mucubirigo arĩgocumo igo. Eropa ta arĩ pepia yuru. Eropa arĩgu Espĩritu Santo ĩgu gamero dopa ta arĩgu iiaa.

## 8

*Goãmarã wéanirãre erã umupeomorã waimurã wejẽ erã apira barire Jesu yarã asũ baburire werepu Pablo*

<sup>1-4</sup> “Gua tamera õaro masia,” arĩ pepiraa mua. Eropa arĩ pepirã mua masiri mera

gajirãre masitarinugadiarã iiaa mũa. Eropa iirã gajirãre itamubeaa mũa. Gajirãre umupeori mera mahirãpũ erãre itamua erã Jesucristore umupeonemoboro dopa. “Masipehocãa yũhũ,” arĩbiricãro gahmea marire. Eropa arĩrã õaro masibeaa mari. Eropirã “Õaro masinibirica dohpa,” arĩ pepiro gahmea marire. Mari Goãmũre mahirãpũre marire masicũ iimi.

Eropigũ goãmarã wéanirãre umupeorã erã pohro apira barire “¿Mari bamasicuri?” arĩ weregũra mũare: Goãmarã wéanirã ne duhpi-morã árĩbeama. Diaye ta erã wéanirãre ne sĩporãri mara. Eropigũ Goãmũ yujugũ ta ãhrimi. Gajirã goãmarã marima. Ire mari masia.

<sup>5</sup> Gajirã masa õpa arĩma. “Mari goãmarã bajarã ãhrima. Erã mari oparã ãhrima,” arĩ pepirima. “Umũsiguere, i yeba sãre goãmarã ãhrima,” erã arĩquerecũ ta maripũre yujugũ ta Goãmũ gohra ãhrimi.

<sup>6</sup> Ĩgũ mari Pagũ árĩpehrerãre, árĩpehrerire árĩdoredigũ ãhrimi. Eropirã ĩgũ ya árĩburire iimorã ãhraa mari. Eropigũ mari Opũ Jesu-cristo yujugũ ta ãhrimi. Ĩgũ árĩpehrerire mari Pagũre ĩhacũnugubasadigũ ãhrimi. Ĩgũ yarã árĩmorãre iipũ ĩgũ marire. Eropirã ĩgũ mera eropa árĩniguirãca mari.

<sup>7</sup> Yũ arĩdiro dopa ta eropa arĩquerecũ gajirã Jesu yarã irire masibeama. Iribojegue erã goãmarã wéanirãre umupeorã “Oã goãmarã ojocarirã ãhrima,” arĩ pepimũriñorã. Irisub-uguere eropa arĩponirã árĩrã dohpague sãre erã wéanirãre erã apira barire barã “Goãmarãre

umupeorã iiaa,” arĩ pepirima. Eropirã iri barire barã, “Mari ñero iirã iiaa,” arĩ pepirima ãaro masibirã. Eropirã “Ñerire iirã iiaa,” arĩ pepiquererã erã irire iicũ erã pepiri gajiropa waca.

<sup>8</sup> Eropigu õpa arĩ werea mware: Iri barire mari bacũ mari babiricũ sãre Goãmũ mera ãaro árĩcũ iibeaa marire. Irire mari babirã ñero iibeaa. Mari irire barã sã gajirã tauro ãarã árĩbeaa mari, arĩ werea yũhũ.

<sup>9-10</sup> Eropa mware werequerecũ ãaro iique mwa. Iri barire barã mwa árĩcũ gajirã Jesu yarã mware ñabocoma. Mware ñarãpũ ãaro masinibirã “Iri barire barã Goãmure umupeobeama,” arĩ pepirã árĩrãcoma. Eropa arĩ pepiquererã mware ñhacũ erã sã babocoma. Iri barire eropa barã “Ñero iirã iiaa mari,” arĩ pepirãcoma erã. Erã eropa arĩ pepicũ erãpũre ñero iicũ iiboca mwa. Eropirã ãaro iique.

<sup>11</sup> Mwarũ masirã árĩrã, “Gua iri barire gua bacũ ãaroca,” mwa arĩ pepirã árĩrã gajirã ãaro masibirinirãre ñero iicũ iiboca mwa mware erã ñhacũcũ. Erã ya árĩburi sãre sãrĩdi árĩmi Cristo. Eropirã mwa bari mera mwa Cristo yarãre mwa acawererãre ñero iicũ iirã erãre goroweoboca mwa.

<sup>12</sup> Õaro masibirãre mwa acawererãre erã arĩ pepiro dopa iibiricũ erã pepiri gajiropa wacũ iiboca mwa. Eropa iirã Cristo sãre ñero iirã iiaa mwa.

<sup>13</sup> Eropigu wéanirãre erã ora barire yũ bagu yũ acaweregure ñero iicũ iiboca yũhũ. Jesu yarã erã ñero iicũ gamebeaa. Eropigu yũhũ “¿Erãre ñero iicũ iiri?” arĩgu, iri barire ne dipaturi

basome yũhu.

## 9

### *Pablo Jesu ïgu apidigu ïgu árĩrare werepũ*

<sup>1</sup> Jesu ïgu yare buhedore ïgu apidigu ähraa. Eropigu gajirã ïgu apinirã erã iiro dopa ta iimasia yũ sã. Jesu ïgu apidigu ta ähraa yũ sã. Mari Opũ Jesure ïadigu ta ähraa yũ sã. Eropirã Jesu yare yũ buhecũ mũapũ irire õaro peenirã árĩrã ïgu yarã wahabũ mũa. Mũa eropa ïgu yarã wara pũhrũ Jesu ïgu apidigu yũ árĩrare masituhabũ mũa.

<sup>2</sup> Gajirã yũre werewuarã “Ïgu Jesu ïgu apidigu árĩbeamĩ,” arĩbocoma. Erã eropa arĩquerecũ ta mũapũ eropa arĩmasibea. Mũare yũ buhera pũhrũ Jesu yarã warã, “Jesu ïgu apidigu ährimi,” arĩ yũre masituhaa mũa. Eropirã gajirã erã werewuquerecũ ta mũapũ ïgu apidigu yũ árĩricũrire mũa masia.

<sup>3</sup> Yũre werewuarãre õpa ta arĩ yũhrigũra.

<sup>4</sup> Mũare yũ buheri waja yũ baburire, yũ ihriburire yũre oro gahmea mũare.

<sup>5</sup> ¿Eropigu marapocũgu árĩgu yũ marapo Jesu yago igo árĩcũ igo mera aĩ curimasibiribocuri yũhu mũa pepicũ? Gajirã Jesu ïgu apinirã, Jesu pagũ porã, Pedro sã erã marasã nome mera erã curiro dopa ta yũ sã curimasiboaya. Yũ eropa curicũ yũ marapocũgu árĩcũ, igo sãre barire oboaya mũa.

<sup>6</sup> Yũhu Bernabé mera mũare õari buherire gũa buhequerecũ ta gũare ne gajinore obeaa mũa.



Eropirã gua basi ta gua baburire mohme wajatabu gua. Gajirã Jesu apinirãpure erã buheri waja oayoro mua. ¿Gua dihta eropa buherã, waja mariro buhero gahmeri mua pepicũ?

<sup>7</sup> Yujugu surara igu mohmecũ igu oparã igu árĩburire wajayemurima. Igu basi wajayebeamí. Barire otegu sã igu otera ducacucũ irire ta tea aĩ bamasimi. Eropigu ovejare ihadibugu igu ejorã apĩcore aĩmasimi ihribu igu sã.

<sup>8</sup> Eropa arĩgu masa erã doreri dihtare mware werebeaa. Goãmu igu dorigue igu arĩra sare mware weregu iiaa.

<sup>9</sup> Igu dorerire erã gojarapũgue õpa arĩ werea: “Wecu trigo yerire igu guburi mera igu suhri wearisubu igu badiacũ igu disirore cãhmotabiricãque,” arĩyoro Moise dorigue. Goãmu eropa doregu wecuare ihadiburire arĩgu iibiriĩnumi.

<sup>10</sup> Eropa doregu guare Goãmu yare buherãre itamudorerore weregu iĩnumi marire buhebu. Pohere séanirã sã iri ducare aĩnirã sã erã mohmera puhru, ducacurisubu iri ducã wajaborore cohrema. Eropa mohmerãre barire oro gahmea marire.

<sup>11</sup> Mware Goãmu ya buherire õari buherire buhebu gua. ¿Gua eropa buheri waja mwapure guare barire obiro gahmeri mua pepicũ? Oro gahmea mware. Mua ocũ õaboaya guare. Eropa árĩquerecũ mua obirimuribu guare.

<sup>12</sup> Eropa guare obirã árĩquererã ta gajirã buherã mware irire odorecũ mua erãpure ohayoro. Erã mware odorecũ guaru erã tauro odore-

masiboaya mũare turaro gua buheri waja.

Eropa dorebonirã árĩquererã ta guapũ “Guare oque,” ne arĩbiribũ. “Cristo ya buherire gamebiribocoma gua dorecũ,” arĩrã guare duhyaquerecũ ta mũare ne odorebiribũ.

<sup>13</sup> Masa Goãmũre umupeorã Goãmũ wihigue bari aĩ apima. I wihi mohmerã iri barire aĩ bahama. Eropirã Goãmũre erã umupeori mesa pohro mohmerã waibũgũre erã soedigũre masa erã aĩ apidigũre merogã aĩ bahama erã sã. ¿Irire masibeari mũa?

<sup>14</sup> Eropa erã iidiro dopa ta õari buherire buherãre erã buhera waja oro gahmea erã baburire. Eropa ta iidorepũ mari Opũ Jesu.

<sup>15</sup> Eropigũ mũare serẽbodi árĩqueregũ ta yũhũ gajinore ne serẽbiribũ mũare. Eropigũ ire dohpaguere gojagũ gajinore waja gamebu gojagũ iibea. Mũare ne waja seadiabea. Sĩribu árĩqueregũ ne waja gamesome yũhũ mũare. Waja mariro buhegũ sũaa. Eropigũ mũare iri buhera waja ne wajata basome.

<sup>16</sup> Õari buherire buhedoregũ apimi yũre Goãmũ. Irire buheri masũ árĩgũ tĩaa yũhũ. Õari buherire buhebigũ ñero waboaya yũhũ. Eropigũ iri buherire buhegũ “Gajirã masitarinũgagũ ãhraa,” arĩbodigũ ne arĩbeaa yũhũ.

<sup>17</sup> Õari buherire yũ gamero buhegũ yũ buheri waja wajaseaboaya yũhũ. Yũ gamero buhebeaa. Goãmũ ĩgũ yare buhedoregũ apimi yũre.

<sup>18</sup> Õari buherire buhegũ mũare yũ buhera waja serẽmasiboaya yũhũ. Eropa serẽmasiqueregũ ne gajinore serẽbigũ waja

mariro iri buherire buhea mũare. Yũhũ eropa iigu árĩgu “Õaro wajatagũca Goãmũ mera,” arãa. Iri ta ãhraa yũ wajatari.

<sup>19</sup> Eropigu yũhũ masare buhegu erã yũ buherire peediacũ õpa iigu iiaa Jesu yarã erã waboro dopa. Ne masa pohro majagu árĩbiriqeregu ta árĩpehrerãre pohro majagu iro dopa iiaa yũhũ erã yũ buherire peediacũ iigu.

<sup>20</sup> Eropigu yũ acawererã judio masa mera árĩgu, judio masa iiro dopa ta iiaa yũhũ yũ buherire erã peediacũ iigu. Goãmũ ãgu dorera Moisere ãgu apira yũre iri dorebiriqerercũ ta, iri doreri dihtare umupeorã mera árĩgu erã dorerire umupeogu iro dopa ta ãhraa yũ sã. Eropa ta iiaa yũhũ erã yũ buherire erã peediacũ iigu Jesu yarã erã waboro dopa.

<sup>21</sup> Moise dorerire umupeobirã mera árĩgu iri dorerire umupeobigu iro dopa ta iiaa. Yũ buherire erã peediacũ eropa ta iigu iiaa yũhũ erã Jesu yarã erã waboro dopa. Eropa iiqueregu Goãmũ dorerire umupeoniguia. Cristo dorerire iiaa.

<sup>22</sup> Eropigu õaro masibirã mera árĩgu erã iro dopa ta ãhraa. “Masipehogu ãhraa,” ne arĩbeaa yũhũ erãre. Eropa ta iiaa yũhũ erã sã Jesu yarã erã waboro dopa. Eropigu árĩpehrerã masa erã árĩricũro dopa ta iiaa yũhũ erãre yũ buherire peediacũ iigu. Yujurãyeri Jesu taurã erã waboro dopa iiaa.

<sup>23</sup> Eropa iiaa õari buherire árĩpehrerã erã õaro peeburire. Erã eropa peera pũhrũ Jesucristo erãre peamegue wabonirãre taumi. Eropigu yũhũ erã mera õaro mucubiriborore eropa iiaa.

24 Mũare werenigui queori mera õpa werea. Omabirarã erã omarã árĩpehrerã omama. Erã eropa omapehrequerecũ ta bũrigã omaturagupũ omajamũhtami. Eropa ejamũhtagũ wajatami. Eropirã erã bũrigã omadiro dopa ta mũa sã Goãmũ gamerire bũrigã iique mũa wajataboro dopa.

25 Árĩpehrerã omamorãpũ yũ dupũre gajiropa iiri arĩrã gajinore duhucãma erã omaboro core. Eropa ta iima erã pũri berore erã wajataboro dopa. Iri pũri bero erã dipuru peyama masa erã wajatarare ãaboro dopa. Eropiro erã eropa ii erã wajatara bero mata pehrea wahaa. Mari sã Goãmũ yare õaro buhemorã gajinore duhucãrã mari wajataboro dopa. Iri mari wajatari tamera ne pehrebeaa.

26 Eropigũ omabiragũ ãgũ noho gamero omaro dopa iibeaa yũpũ. Yũ gamero iimaacãbeaa. Goãmũ gamerire masigũ iiaa gajirãre itamuboro dopa.

27 Eropigũ yũ gamero dopa iibeaa. Yũ ãaribejari yũre dorebeaa. Masa erã Goãmũ mera taricũ itamuburi dihtare iiaa. Eropa iibigũ gajirãre Goãmũ yare buhedigũ yũ árĩquerecũ ta Goãmũ yũre “Õaro iibũ,” arĩbiribocumi.

## 10

*“Goãmũ ãhrimi,” erã arĩ goãmarã wéanirãre umupeodorebiripũ Pablo*

1 Eropirã yũ acawererã, ire masique mũa. Mari ñecũ sũmarã mũra iribojegũ majarã árĩpehrerã mũrague mera Goãmũ árĩmũriñumi.

Īḡu imica curu mera erāre wamuhtañumi. Erā ĩḡure eropa nurusia wahgārā wuariya deco diariya waicuriya eja oaro taribuja wañuma.

<sup>2</sup> Erā árīpehrerā imica curu doca árīnirā wuariya taribujanirā Moise yarā wañuma.

<sup>3</sup> Eropirā erā árīpehrerā umaro maja di-juri barire bamuriñuma. Goāmḡu ĩḡu orire bamuriñuma.

<sup>4</sup> Eropa barā erā árīpehrerā Goāmḡu ĩḡu ori deco sāre iħrimuriñuma. Irisubuguerē erā ihriburi decore Goāmḡu ĩḡu apira utāyegue iri decore wiridoreñumi. Erā iri deco ihridiro dopa Cristo iri utāye iro dopa ĩḡu ta erāre ojocariro odi árīñumi. Īḡu erā mera árīmuriñumi.

<sup>5</sup> Erā eropa wanirā erā árīquerecū ta erā mera majarā bajarā ñero erā iicū ĩagḡu Goāmḡu erāre ĩhasuabiriñumi. Eropigḡu erāre masa mariroque boacū iĩñumi Goāmḡu.

<sup>6</sup> Erāre eropa wara marire güisāburi āhraa erā iidiro dopa ta mari ñerire uaribejabiriborore.

<sup>7</sup> Eropirā goāmarā wéanirāre erā umupeodiro dopa iibita mu. Wecure erā wéadigure erā umupeodirore Goāmḡu yare erā gojarapū werero opa arāa: “Masa erā ba doaja ihrituha, wahgānugaja, bosenu iĩñuma,” arī gojamuriñumi iribojeguere.

<sup>8</sup> Puhru gajirā erā mera majarā nome mera ñero iĩñuma. Erā iidiro dopa iibiricāro gahmea marire. Erā eropa ñero iira dipuwaja yujunḡu ta erā veintitrés mil gohra masa sīria wañuma.

<sup>9</sup> Gajisubugue gajirā erā yujurāyeri Goāmḡu erā gamero dopa iicū gamerā opa ĩḡure arī turiñuma. “Mari Opḡu itamumasibeami marire,”

arĩñuma Goãmure turirã. Eropa arĩ turirã ãgure guacũ iĩñuma. Erã iidiro dopa iibiricãro gahmea marire. Erã eropa iira dipuwaja Goãmũ erãre añaa mera cĩri wejẽdoreñumi.

<sup>10</sup> Gajisubu daja erã mera majarã gajirã ñerã erã basi Goãmũ iirare dũyasocũ anyu masare wejẽgũpũ erãre wejẽñumi. Eropirã erã iidiro dopa iibiricãro gahmea.

<sup>11</sup> Eropa iĩñumi Goãmũ marire buhebu. Maripũ pehrerinũ coregã árĩrã ãhraa. Mari eropa árĩrã árĩcũ iribojegue majarã erã eropa warare Goãmũ gojadoreñumi marire gũisãgũ.

<sup>12</sup> Eropirã mũapũ “Yũ tamera õaro iiaa yũhũ,” arĩ pepirã árĩrã õaro iique ñerire iiri arĩrã.

<sup>13</sup> Mari árĩpehrerã yujugũ dũhyaro mariro yujuyerisuburi ñerire guña. Eropa guñarã iri ñerire iidiaa. Mari eropa iidiaquerecũ ta Goãmũpũ marire itamuniguicãgũ iimi. Ìgũ arĩdiro dopa iigũ ãhrimi. Eropigũ marire iri ñerire iidiarare tarinũgacũ itamumi. Marire guñaturacũ iimi. Eropa guñaturarã warã iri ñerire iidiasome. Eropirã árĩpehreri ñeri iidiaquererã iri ñerire tarinũgarãca.

<sup>14</sup> Eropirã mũa yũ mahirã yure peeque. Ne merogã goãmarã wéanirãre ne umupeobiricãque.

<sup>15</sup> Mũa õaro pee masirã mũa árĩcũ mũare werea. Eropirã yũ arĩri diaye árĩcũ masique mũa.

<sup>16</sup> Mari gamenere bocatĩrirã Goãmure “Õhaa,” arĩra pũhrũ iri vino deco dicũripare ihria mari. Eropa ihrirã “Cristo mari ya ñero iira dipuwajare ãgũ di cóãra mera ãgũ mera árĩrã ãhraa

mari,” arĩ masia. Eropirã panrure mari Cristo yarã nuha barã iiaa mari. Eropa barã “Mari ya árĩburire ãgũ dũpũ crusague sĩrira mera mari ãgũ mera árĩrã yuju dũpũ iro dopa ãhraa mari,” arĩ masia.

<sup>17</sup> Eropirã mari yujuru panrure nuha baro dopa árĩpehrerã mari Cristo yarã yuju dũpũ iro dopa ãhraa. Eropirã yuju curu ta ãhraa.

<sup>18</sup> Moise dorerire iirã erã iirire guñaque mũa. Goãmũ wihigue erã waibugure wejẽ soema Goãmũre umupeomorã. Erã eropa wejẽ soera pũhrũ erã soedigure bahama. Eropa barã yuju curu ta Goãmũ yarã árĩrã ta iima.

<sup>19</sup> Ōpa ta arĩgũ goãmarã wéanirã diaye ãhrima, arĩbeaa. Goãmarã marima, arãa. Eropirã goãmarã wéanirã eropárĩcãrã iima. Eropiro goãmarã wéanirã pohroque erã apira baripũ bu gohra ta ãhraa. Iri bari bacũ marire gajiropa iibeaa, arãa yũhũ.

<sup>20</sup> Yũhũ eropa arĩqueregũ ta iri barire mũa bacũ gamebirica. Ōpa ãhraa iri: Jesu yarã árĩbirã goãmarã wéanirã pohroque waibugure wejẽburire apirã Goãmũre umupeobeama. “Gũa goãmarãre umupeorã iiaa,” arĩrã watẽapũre umupeorã iima erã. Erã eropa umupeocũ erã umupeori wihigue erã mera mũa batamurã watẽa mera árĩrã iro dopa iirã iica mũa. Mũa eropa iicũ tamerare ne gamebeaa.

<sup>21</sup> Bocatĩrirã vino deco dicũripare ihrirã panrure nuha barã “Cristo mera ãhraa,” arãa mari. Mari eropa iirã árĩrã, watẽa yapũre ihri, bama-sibeaa mari. Eropirã goãmarã wéanirã pohro apira barire erãre umupeorã mera iri barire

batamumasibeeaa mari.

<sup>22</sup> Mari Opu İgu yaräre mahimi. Eropirã eropa barã watëa yarã iro dopa iirã İğure guacũ iirãca. İgu guacũ mua turabeeaa İgu dipuwaja cãhmotaboro dopa.

*Goãmũ İgu gameri dihtare iique, arĩ gojañumi Pablo*

<sup>23</sup> “Goãmũ iidorebirira árĩpehreri iimasiri ähraa yäre,” arĩboca mua. Mua iiri ñeri iri árĩbiriquerecũ ta irire iirã gajiräre itamubiriboca mua. Eropirã Jesure umupeonemocũ iibiriboca mua gajiräre.

<sup>24</sup> Mari ya õaro árĩburi dihtare iibiricãro gahmea. Gajirã ya árĩburi sãre õaro itamuque mua.

<sup>25-26</sup> Eropirã gajiräre itamuburire õpa iique: Bari duarogueere barire asũrã warã “¿I bari goãmarã wéanirã pohroque erã apira bari ähriri?” arĩ, serëpiñabiricãque. “¿Ñerire iiri?” arĩrã, serëpiñaboca mua. Goãmũ yare gojarapũgue õpa ähraa: “I yeba árĩri árĩpehreri Goãmũ ya ähraa,” arĩ gojañuma. Eropirã iri barire “Goãmũ badorebirira bari ähraa,” arĩbiricãque.

<sup>27</sup> Jesure umupeobigu mũare badoregu İgu sihucũ wadiarã waque. Eropa warã mũare İgu ejorire baque. “¿I bari goãmarã wéanirã pohro erã apira bari ähriri?” arĩ serëpiñabita.

<sup>28</sup> Gajigu ero árĩgu õpa arĩbocumi mũare: “I bari goãmarã wéaniräre erã wejë apira dihi ähraa,” arĩbocumi İgua. İgu eropa arĩ werecũ iri bari tamerare babita. Mũare eropa arĩ weredigu “Iri barire barã ñerire iirã iica,” arĩ



pepibocumi. Īgũ eropa arĩ pepibiriboro dopa “Babita,” arãa yũhũ mũare.

<sup>29</sup> Eropa arĩgũ mũa ya árĩburire weregũ iibeaa. Mũare iri barire weredigũ ya árĩburipũre arĩgũ iiaa mũare. Irire mũa bacũ ĩha mũare ĩhacũ ĩgũ sã babocumi. Īgũpũ eropa bagũ “Ñero iigũ iiaa,” arĩ pepibocumi. Eropirã “¿Eropa iibocuri ĩgũ?” arĩ iri barire babita.

“Babita,” yũ arĩcũ õpa arĩ yũhriboca mũa yũre: “¿Dohpa árĩrono gajigũ gajiropa pepiri arĩrã gũa gamero iimasibiribocuri gũa?”

<sup>30</sup> Goãmũre gũa ‘Õhaa,’ gũa arĩra pũhrũ gũa bacũ gajigũ irire gũa barare gũare weresãmasibeami,” arĩboca mũa yũre. Yũpũ õpa yũhria.

<sup>31</sup> I árĩpehrerire mũare yũ wererare weregũ õpa arĩgũ iiaa mũare: Ëmũri nũcũ mũa mohmerã, barã, ihrirã, árĩpehrerire iirã irire Goãmũ ya árĩburi dihta iique. Eropirã árĩpehrerã masa Goãmũre “Õagũ, turagũ ãhrimi,” erã arĩ umupeoboro dopa iique.

<sup>32</sup> Ne mũa iiri mera judio masare, judio masa árĩbirãre, Goãmũ yarã sãre goroweobiricãque.

<sup>33</sup> Õpa iiaa yũpũ. Masa árĩpehrerã erã sũaboro dopa iiaa árĩpehreri mera. Eropigũ yũ gamero dopa iiniguicãbeaa yũa. Gajirã masa ya árĩburipũre õaro iiaa. Erãre Jesucristore umupeoborore eropa iiaa. Erã ĩgũre umupeora pũhrũ erãre peamegue wabonirãre taugũcumi.

## 11

<sup>1</sup> Cristo gajirã ya árĩburire árĩpehrerire iimi.

Eropirã Cristore yu ñhacũdiro dopa ta mua sã yu iidiro dopa ta yare ñhacũque.

*Corinto majarã erã gamenererogue nome erã iiborore werepũ*

<sup>2</sup> Mũare yu árĩpehrerire buherare, buhe turirare guñapeo waĩcuabu. Eropa guñarã mũare yu arĩrare yu iidorediro dopa ta ii waĩcuabu mua. Eropa iirã õaro iiaa mua.

<sup>3</sup> Dohpaguere i sãre mua masicũ gahmea: Árĩpehrerã ɯma opu Cristo ãhrimi. Eropigu nomeo opu ɯmu ãhrimi. Eropigu Cristo opu, ĩgu Pagu Goãmũ ãhrimi.

<sup>4</sup> Mũa Goãmũre umupeo gamenerecũ yujugu Goãmũre serẽgu dipuru bua serẽgu õaro ĩgu opũre umupeogu iibeami. Goãmũ yare were-taugu sã dipuru buagu ĩgu opũre umupeobeami ĩgu sã. Eropirã ɯmapũ Goãmũre serẽrã dipu buabiricãporo.

<sup>5</sup> Eropigo nomeopu dipuru buabigo Goãmũre serẽgo igo mapũre umupeogo iibeamo. Goãmũ yare werego sã dipuru buabigo eropa ta igo sã umupeobeamo. Eropirã nomepu Goãmũre serẽrã dipu buaporo. Dipuru buabigo igo poarire erã õaro wũapehodigo iro dopa ta ãhrimo igo.

<sup>6</sup> Dipuru buadiabigore igo poarire seapehoro. “Yu poarire sea wũapehodiabeaa. Guhyasĩriboca,” arĩgo igo dipurare buaporo.

<sup>7</sup> Mũa ɯmapũ Goãmũ iro dopa oparã ãhraa. Eropirã Goãmũ õagu, turagu, ĩgu árĩricũrire ĩhmuma erãpu. Eropirã erã dipu buabiricãporo. Nomepu “Gua oparã ɯma ãhrima,” arĩ ĩhmuma. Eropirã erãpu dipure buaporo.

8 Goãmũ Ʃmũre iigu, nomeo ya dũpũ mera Ʃmũre iibiriĩnumi. Nomeopũre iigu, Ʃmũ ya dũpũ mera igore iĩnumi.

9 Eropigu Ʃmũre iigu sã nomeo yagu árĩbure iibiriĩnumi. Nomeopũre iigu Ʃmũ yago árĩbore iĩnumi Goãmũ igore.

10 Eropirã mũa Goãmũre umupeorã gamenerecũ nome dipure bũaporo anyua sã erã ihasũaboro dopa. Eropa bũarã “Ʃma gũa oparã àhřima,” arĩ iĩmurã iima.

11-12 Goãmũ nomeore iigu, Ʃmũ dũpũ maja mera iĩnumi. Dohpaguere Ʃma masa dehyoarã nome dũpũgue masa dehyoama. Eropiro Ʃmũ iigu árĩmũhtabiricũ nome mariboũuma. Eropi nome maricũ Ʃma sã mariboũuma. Eropirã erã Jesu yarã árĩrã, Ʃma seyaro nome seyaro árĩmasibeama. Goãmũpũ árĩpehřerire apidi árĩmi. I yeba árĩřire i yeba iiburire apidi árĩmi.

13 ¿Mũa basi dohpa pepiri? ¿Nomeo igo dipuru bũabigo, Goãmũre igo serẽcũ õhari mũa pepicũ? Õabeaa.

14 Eropirã Ʃmũ iigu poa ñapo iigu ómacũ iĩha masa werewũama. Árĩpehřerã masa irire masima.

15 Nomeopũ poa ñapo ómago árĩcũ õapũřica. Igo poari igo dipuru bũari iro dopa ta àhřaa. Iri sãre árĩpehřerã masima.

16 Mũa mera majagu ire yũ wererare dũyasodiagu õpa masiporo iigu: Irire yũ arĩdiro dopa ta Eropa dihta iiniguicãa mari. Gajirã Jesu yarã sã erã gamenererogue Eropa dihta iiniguicãama.

*Bocatĩrirã erã barisubu goroweoñorã Corinto majarã*

<sup>17</sup> Dohpaguere mũare gajinore werebu, “Õaro iirã ãhraa,” arĩbeaa yũhũ mũare. Mũa gamenererẽ ãaro iirã iibeaa. Eropirã mũa gamenererore goroweorã iiaa.

<sup>18</sup> Õpa arĩ weremuhtagura mũare: Mũa gamenererogue eropa game dũyazorã mũa basi yujurayeri cururi dũca wariayoro mũa. Gajirã yũre irire erã eropa arĩ werecũ “Diaye ta arĩca,” arĩ pepia yũhũ.

<sup>19</sup> Eropa dũca warirã õpa arĩca mũa: “Dũca wari wiriario gameca marire Jesu yarã gohra arĩrãpũre ãhmuborore,” arĩca mũa basi.

<sup>20</sup> Mũa basi gamenere barã mũa yujuro arĩbirã mari Opũ Jesucristo dorediro dopa diaye ta bocatĩrirã iibeaa.

<sup>21</sup> Mũa gamenere barã yujurãyeri mũa seyaro bamũhta, ihrimũhta gajirãre corero mariro. Mũa eropiicũ gajirã oaboa wahama. Gajirãpũ merea wahama.

<sup>22</sup> ¿Mũa seyaro badiarã duhpirã mũa ya wirigue babeari? ¿Eropirã duhpirã dohpaguere Goãmũ yarã gamenererore “Duhpiburi arĩbeaa,” arĩdiari? ¿Eropirã duhpirã Jesu yarãre mojomorocũrãre bari moorãpũre mũa gũhyasiuro taricũ iiri? ¿Dohpa arĩ weregucuri yũhũ mũare? Õaro iirã iiaa mũa, arĩbeaa yũhũ.

*Goãmũ yare bocatĩrirã diaye erã iiburire wererũ Pablo*

<sup>23</sup> Goãmũ yare bocatĩriburire mari Opũ Jesu weremi yũre. Eropa ãgũ wererare yũpũ mũare

irire werebũ. Iri õpa ãhraa: Īgure ĩhaturirãre Juda ĩgũ sihurisubu iri ñami ta mari Opũ Jesu-cristo panrure aĩ,

24 Goãmure “Õhaa,” arĩpũ. Īgũ eropa arĩra pũhrũ iriru panrure nuha, ĩgũ buherãre guerepũ. Eropa gueregũ õpa arĩpũ: “I yũ dũpũ ãhraa. Mũa ya árĩburire sĩrigũca. Yũre mũa guñaburire yũhũ dohpaguere mũare ĩhmuro dopa aĩ baque,” arĩpũ Jesu mari Opũ.

25 Erã bara pũhrũ ĩgũ panrure aĩdiro dopa ta ihriripare aĩgũ õpa arĩpũ: “Mũa ñeri iirare cóãbu sĩrigũca. Eropa iigũ yũ dire cóãgũca. Yũ di cóãra mera Goãmũ masare ‘Mũa mera amugũra,’ ĩgũ arĩdiro ojogorocũroca. ĩpa dicũrire ihrirã yũ di cóãrare guñarãca. Ire ihrirã mũa yũre guñaburire yũhũ mũare ĩhmudiro dopa iique,” arĩpũ Jesu.

26 Yũ werediro dopa ta iru panrure mũa barã, ihririre ihrirã, Jesu mari Opũ mari ya árĩburire ĩgũ sĩrirare ĩhmurã iiaa mũa. Eropa ĩhmuniguirãca mũapũ ne ĩgũ i yebague ĩgũ dujaracũgue.

*Goãmũ yare bocatĩrimorã õpa iique, arĩ go-jañumi Pablo*

27 Mũa Goãmũ yare bocatĩrimorã gamenere baha, ihrirã, umupeoro mariro gũhyadiaro mariro iirã dipuwajacũrãca. Eropa iirã mari ya árĩburire Jesucristo ĩgũ dũpũre ĩgũ di cóãra sãre wereyaro dopa iirã iiaa mũa.

28-29 Īpa arĩ guñaro gahmea: “Mari Jesu yarã gamenererã yuju curu yuju dũpũ iro dopa ãhraa. Mari Jesucristo yarã ãhraa,” arĩ

guñaro gahmea. Irire queoro guñabirã, mari iri panrure baha, ihriripare ihrirã queoro iibirã mari dipuwajacumorã árĩrãca. Eropirã mari bocatĩriboro core mari árĩricurire guñamũhtaro gahmea ñero iiri arĩrã. Eropa iira puhru bocatĩri ihri bamasia mari.

<sup>30</sup> Eropa guña amubirira waja bajarã mua mera majarã dorecurã árĩcoma. Erã yujurãyeri turabirã árĩcoma. Eropirã gajirã erã eropa iira dipuwaja sĩria wañuma.

<sup>31</sup> Erã baha, ihriboro core erã árĩricurire õaro guña, erã ñeri iirire duhunirã, erã ñeri dipuwajare dipuwajacubiriboñuma.

<sup>32</sup> Mari Opuru marire igu yarãre dipuwaja moagu mari ñeri iirire duhucũ iigu iimi. Jesure gamebirãre igu dipuwaja moaboro dopa marire dipuwaja moabiriborore eropa iimi. Mari peamegue wabiriborore dohpaguere marire dipuwaja dabero moami mari Opu.

<sup>33</sup> Eropirã yu acawererã, bocatĩrimorã gamenererã, mua basi corenique.

<sup>34</sup> Eropirã mua mera majarã oaboarã, erã ya wihigue bamũhtaporo. Eropirã bocatĩrimorã õaro gamenere baque mua ñero dipuwajacurã wabiriborore. Gajinore werediarabu mware. Puhru yu basi ejaqu mware weregura irire.

## 12

*Goãmũ ya árĩburire mari mohmeburire apigu marire irire iimasicũ iimi Espĩritu Santo, arĩ gojañumi Pablo*

<sup>1</sup> Yũ acawererã, õpa mũare weregu ire mũare masicũ gahmea. Goãmũ ya árĩburire mari mohmeburire apigũ marire árĩpehrerãre irire iimasicũ iimi Espíritu Santo.

<sup>2</sup> Mũa Jesu yarã árĩnibirã gajiropa árĩri buherire pee nũrũrã árĩrã, mũapũ goãmarã wéanirãre umupeoyoro. Noho mũa bocarãre wereniguibirãre umupeoyoro. Irire masia mũa.

<sup>3</sup> Eropa árĩnirã mũa árĩcũ dohpaguere õpa arĩ werediaca mũare. Espíritu Santo ita-muri mera wereniguirã “Jesu ñero waporo,” ne arĩmasibeama. Eropirã Espíritu Santo ita-muri mariro wereniguirãpũ “Jesu árĩpehrerã wecague opũ mari Opũ ãhrimi,” arĩmasibeama.

<sup>4</sup> Goãmũ ya árĩburire mohmemasiburi baja ãhraa. Irire marire iimasicũ iigũpũ yujugũ ta ãhrimi. Ĩgu Espíritu Santo ãhrimi.

<sup>5</sup> Eropiro Goãmũ ya árĩburire iimasiri mera mari mohmeburi baja ãhraa. Irire mari iiburire doregu yujugũ ta mari Opũ Jesu ãhrimi.

<sup>6</sup> Mari ĩgu yarã ĩgu ya árĩburire iimasiri mera mari mohmeri yujuropa ta árĩbeaa. Iri mohmeri õaro wacũ iigu yujugũ ta Goãmũ ãhrimi.

<sup>7</sup> Espíritu Santo marire Jesu yarã nũcare mari iimasiburire apigũ Goãmũ turarire ĩhmugũ iimi. Őpa ta iimi ĩgu Jesu yarãre árĩpehrerã mari õaro mohmeborõ dopa.

<sup>8</sup> Yujurãyerire õaro masiri mera werecũ iimi Espíritu Santo ta. Eropigũ gajirãre Goãmũ yare õaro buhecũ iimi ĩgu Espíritu Santo.

<sup>9</sup> Eropigũ gajirãre “Mari Goãmũ mera õaro iimasia,” arĩ Goãmũre guñaturacũ iimi Espíritu

Santo ta. Eropa iigu gajirãre turarire Espiritu Santo ta ohomi ãgu. Iri turarire ãgu ocũ erãpũ dorecurãre õarã wacũ iima. Espiritu Santo yujugu ta árĩgu iri turarire ohomi.

<sup>10</sup> Eropigu ãgu gajirãre deyro moarire iimasicũ iimi ãgu. Eropa iigu Goãmũ yare õaro weretaumasicũ iimi ãgu gajirãre. Eropa iigu gajirã Jesu yarãre buherire õaro beyemasicũ iimi ãgu. Eropa masirã watĩ ya buheri árĩcũ masima erã. Espiritu Santo gohra ya iri buheri árĩcũ sãre masima erã. Eropigu gajirãre erã peeyamarirã yare wereniguimasicũ iimi ãgu. Eropigu peeyamarirã yare erã wereniguicũ gajirãre weretaumasicũ iimi.

<sup>11</sup> Iri árĩpehrerire iimasirire apigu ta Espiritu Santo ta yujugu ta ãhrimi. ãgu gamero dopa ta marire yujurãyerire mari mohmeburire apimi.

*Cristo yarã árĩrã yuju curu ta ãhraa mari, arĩ gojañumi Pablo*

<sup>12</sup> Werenigui queori mera muare weregura: Mari dupũ yuju dupũ árĩquerecũ ta, mojotori, cuiiri, guburi, gamiri, iri tamera baja ãhraa mari dupũre árĩri. Eropa ãhraa mari Cristo yarã. Bajarã árĩquererã ta yuju dupũ iro dopa ta yuju curu ta ãhraa ãgu mera.

<sup>13</sup> Eropirã Cristo yarã árĩrã ãgu dupũ iro dopa yuju curu ta ãhraa mari. Judio masa, judio masa árĩbirã, pohro majarã, pohro majarã árĩbirã, baja cururi árĩquererã ta yujugu árĩgu ãgu dupũ iro dopa yuju curu ta ãhraa mari. Espiritu Santo yujugu ta árĩgu ãgu turari mera waĩyesũnirã marire yuju curu Cristo yarã árĩcũ iimi. Eropirã



mari árĩpehrerã yujugũ Espĩritu Santore opaa Cristo ya curu majarã árĩrã.

Eropirã mari Cristo yarã yuju dũpũ iro dopa ãhraa.

<sup>14</sup> Mari dũpũ yuju dũpũ árĩquerecũ ta mojtore, cuiru, guburi, gamiri iri mari dũpũ árĩri baja ãhraa.

<sup>15</sup> Mũ guburo wereniguiri guburo árĩro õpa arĩboya mũre gajiropa arĩro: “Mũ mojtore árĩbeaa yũhũ. Eropiro mũ dũpũ maja árĩbeaa yũhũ,” arĩboya. Mũ guburo eropa arĩquerero ta mũ dũpũ maja árĩro ta iiaa.

<sup>16</sup> Mũ gamiro wereniguiri gamiro árĩro õpa arĩboya mũre: “Mũ cuiru árĩbeaa yũhũ. Eropiro mũ dũpũ majaru árĩbeaa yũhũ,” arĩboya. Mũ gamiro eropa arĩquerero ta mũ dũpũ maja gamiro árĩro ta iiaa.

<sup>17</sup> ¿Mari dũpũ cuiru dihta árĩcũ dohpa peebocuri mari? Masiya mara. ¿Eropirã mari dũpũ gamiro dihta árĩcũ dohpa ii wĩji pepibocuri mari? Masiya mara.

<sup>18</sup> Eropa árĩbeaa mari dũpũ. Õpa ãhraa. Mari dũpũ árĩrinore árĩpehrerire Goãmũ ĩgũ gamero dopa ta apidi árĩmi mari dũpũre.

<sup>19</sup> ¿Mari dũpũ árĩri maricũ dohpa waboyuri mari dũpũ? Mariboya.

<sup>20</sup> Mari dũpũ õpa ãhraa: Yuju dũpũ árĩquerecũ ta mari dũpũ árĩri baja ãhraa. Eropa ta mari Jesu yarã yuju dũpũ iro dopa árĩquererã bajarã ãhraa mari basi game itamumorã.

<sup>21</sup> Eropiro mũ cuirupũ mũ mojtore “Mũ itamucũ gamebeaa,” arĩmasibeaa. Eropiro mũ

dipuru mu guburire “Mu itamucã gamebeaa,” arĩmasibeaa.

<sup>22</sup> Gaji mari dupu arĩrire “Bu arĩnariri ahraa,” mari arĩripure uputu gahmea mari.

<sup>23</sup> Eropirã gaji mari dupu arĩrire “Bu arĩnariri ahraa,” arĩ pepia. Eropirã irire oaro deyoporo arĩrã oaro ahmua. Eropirã gaji mari dupu arĩrire mari guhyasĩrisãrire oaro ahmua oaro arĩboro dopa.

<sup>24</sup> Gaji mari dupu arĩrire mata oari deyoripure eropa amubeaa mari. Goãmu mari dupu arĩri yujuñe gajiñere gamebircũ iibiridi arĩmi. Igũ mari dupu arĩrire arĩpehrerire oaro amudigu arĩmi yuju dupu oaro dupucuburire. Eropa iigu “Bu arĩnariri ahraa,” mari arĩripure mari oaro gamecũ iimi. Eropa ta ne yujugure Jesu yagure “Bu arĩgu ahrimi,” arĩmasibeaa mari.

<sup>25</sup> Eropa ta arĩdoredi arĩmi Goãmu mari dupu arĩri yujuro mera iri basi game itamuboro dopa.

<sup>26</sup> Mari dupu arĩri yujuñe ñero taricũ gaji mari dupu arĩri sã ñero taria. Eropiro mari dupu arĩri yujuñe oaro arĩcũ mari dupu arĩpehrero oaro pepia.

<sup>27</sup> Eropa arĩgu opa arĩdiagũ iiaa muare: Muapu Cristo igũ dupu iro dopa arĩrã yuju curu ta ahraa. Eropirã arĩpehrerã mua igũ dupu arĩri iro dopa ahraa igũ yarã arĩrã.

<sup>28</sup> Eropigu Jesu yarã gamenererã watope mari game itamuburire apidigu arĩmi Goãmu marire. Opa apipu igũ marire: Yujurãyeri guare buhedoregu Cristo apimuhtadigu arĩmi. Ero puhru gajirãre igũ yare weretaumorãre apidi

árĩmi. Ero pũhrũ gajirãre Jesu yarãre buhemorãre apidi árĩmi. Eropigu gajirãre deyoro moarire iimorãre, gajirãre dorecurãre erã taricũ iimorãre, erã pũhrũ gajirãre masare itamumorãre, gajirãre oparã árĩmorãre apidi árĩmi. Ero ojogoro peeyamarirã yare wereniguimorãre apidigu árĩmi marire.

<sup>29</sup> Eropa ĩgu apicũ árĩpehrerã yujuropa iimorã árĩbeaa mari. Mari árĩpehrerã Jesucristo yare buhedore ĩgu apinirã árĩbeaa mari. Eropirã Goãmũ ĩgu yare weretaurã mari árĩpehrerã árĩbeaa. Eropirã árĩpehrerã masare buherã árĩbeaa. Eropirã mari árĩpehrerã deyoro moarire iimasirã árĩbeaa mari.

<sup>30</sup> Eropirã mari árĩpehrerã dorecurãre tau-masirã árĩbeaa mari. Eropirã mari árĩpehrerã peeyamarirã yare wereniguimasimorã árĩbeaa. Eropirã gajirã erã wereniguirire weretaumasi-morã mari árĩpehrerã árĩbeaa.

<sup>31</sup> Eropirã Goãmũ ya árĩburire mohmemasi-buriñere gamerã ðaripũre turaro gameque mũa. Eropigu árĩpehreri yũ arĩra tauro ðaro mũa iiburire dohpaguere weregũra yũhũ.

## 13

*Gajirãre erã ðaro mahiburire, umupeoburire wereñumi Pablo*

<sup>1</sup> Peeyamarirã yare masa ya wereniguirire, anyua ya sãre wereniguimasiquererã ta gajirãre mahibirã, duhpimorã árĩbiriboya mari. Eropiro mari wereniguiri sã eropa busũmaacãboaya mari gajirãre mahibirã árĩrã.

<sup>2</sup> Goãmũ yare òaro weremuhtamasiquererã ta gajirãre mahibirã bu árĩmaacãrã árĩboya mari. Eropirã masa erã masibirirare Goãmũ yare árĩpehreri masiri masipehoquererã ta gajirãre mahibirã, bu árĩmaacãrã árĩboya mari. Goãmũre òaro umupeotariri mera utãgũ “Gajipũgue waporo,” arĩrã wadoremasicquererã, mari gajirãre mari mahibirã bu árĩrã árĩboya.

<sup>3</sup> Mari yare árĩpehrerire mojomorocũrãre oquerecũ ta erãre mahibiricũ iri mari ora duhpiburi árĩbiriboya. Eropirã Goãmũ ya árĩburire mari iira dipuwaja mari dupũre gajirãpũ soequerecũ ta, gajirãre mari mahibiricũ iri duhpiburi árĩbiriboya.

<sup>4</sup> Gajirãre mahirã mata guabeaa erã mera. Erãre mahirã òaro iiaa. Eropirã gajirãre mahirã erã marire opanemocũ ìhaturibea. Eropirã mari mahigũ mera árĩrã “Mũ tauro árĩgũ ãhraa yũhũ,” arĩrã iibeaa mari. Gajirãre mahirã, “Erãre masitarinũgaa,” arĩ pepibeaa.

<sup>5</sup> Eropirã gajirãre mahirã erãre umupeori mera queoro iiaa mari. Gajirãre mahirã mari ya árĩburi dihtare guñabeaa. Erã ya òaro árĩburi sãre guñaa. Eropirã erãre mahirã disitĩri wereniguibeaa mari. Eropirã marire erã ñero iicũ sãre erã mera guawajabeaa mari.

<sup>6</sup> Gajirãre mahirã erã ñero iire mucubiribeaa mari. Diaye majapũre erã iicũ ìarã burigã mucubiria erã mera.

<sup>7</sup> Gajirãre mahirã erã ñeri iicũ gajirãre ne quere moabeaa. Eropirã gajirãpũ erãre erã werewũacũ peequererã ta irire peediabeaa mari. Òari dihtare peediaa mari. Gajirãre mahirã

“Ōarire iirācoma,” arĩ cohrea mari erāre. Gajirāre mahirā erā iira mera mari ñero tariquererā ta erāre mahi duhusome mari.

<sup>8</sup> Gajirāre game mahiri ne pehresome. Goāmũ yare weretauripũ pũhrũ duhpiburi árísome. Peeyamarirā ya wereniguiri sã pehrea waroca. Goāmũ yare masitariri wajamariroca pũhrũgue. Mari masipehora pũhrũgue duhpiburi gohra árísome iri.

<sup>9</sup> Dohpaguere Goāmũ yare mari merogã masia. Eropirã mari ãgũ yare wererã mari merogã weremasia.

<sup>10</sup> Pũhrũgue ta mari masipehorãca. Eropiro mari merogã masira duhpiburi árísome. Irisubugue masipehorãca.

<sup>11</sup> Iri õpa āhraa: Majigũ árĩgũ majigũ dopa wereniguiribũ yũhũ. Eropigũ majigũgã dopa pepiribũ. Eropigũ bugũ wagũ majigũ iro dopa árĩrare duhucãbũ. Eropa ta pũhrũguere mari dohpaguere merogã masirare duhura pũhrũ masipehorãca.

<sup>12</sup> Diuru õaro masũre deyocũ iibiro dopa ta dohpaguere õaro masipehonibea dohpa mari. Pũhrũ Goãmũre mari õaro ãhamasirãgue mari masipehorãca. Dohpaguere mari merogã dihta masia dohpa. Goãmũ marire ãgũ masipehodiro dopa ta pũhrũ mari sã õaro masipehorãca.

<sup>13</sup> Eropirã dohpaguere mari iimasiburi uħreñe dujaroca. Goãmũre “Diaye ta árĩgũ āhrimi,” arĩ umupeoniguirãca. Eropirã marire ãgũ mera õaro árĩniguirire mucubiri coreniguirãca. Eropirã gajirāre game mahiniguirãca. Goãmũre

umupeori, ĩġu mera árĩborore mucubiri coreri tauro āhraa game mahiripũ.

## 14

*Peeyamarirã yare wereniguirire wereñumi Pablo*

<sup>1</sup> Eropirã gajirãre game mahirã árĩque mũa. Eropirã Goãmũ ya árĩburire mũa mohmema-siburire Espĩritu Santo ĩġu apirare turaro gameque. Goãmũ yare mũa weremasiburi tamerare bũrigã gameque mũa.

<sup>2</sup> Peeyamarirã yare wereniguĩġu Goãmũ dihta peeborore wereniguimi. Eropa arĩ wereniguĩġu masa peeborore wereniguĩġu iibeami ĩġu. ĩġu Eropa arĩ wereniguicũ peerã masapũ ne pee-beama ĩġure. Masa erã masibiririre Espĩritu Santo ĩġu turari mera wereniguĩġu iimi ĩġu.

<sup>3</sup> Goãmũ yare weretaũġupũ masapũ peeburire weremi. Eropa wereġũ ĩġu masare itamugũ iimi ĩġu. Eropiġũ erãre Jesucristore umupeonemocũ iimi. Eropiġũ ĩġu erã ñero taricũ ĩġu erãre õaro sĩporãcũcũ iimi.

<sup>4</sup> Peeyamarirã yare wereniguĩġu ĩġu basi dihtare Jesucristore umupeonemocũ iimi. Gajirãre Jesucristore umupeonemocũ iibeami. Goãmũ yare weretaũġupũ gajirãre Jesu yarã gamenererãre Jesucristore umupeonemocũ itamumi ĩġu.

<sup>5</sup> Peeyamarirã yare árĩpehrerã mũa wereniguicũ õaboya yũ pepicũ. Eropa árĩquerecũ ta Goãmũ yare mũa weretaucũ tamerare turaro gahmea. Goãmũ yare weretaũġupũ peeyamarirã yare wereniguĩġu

tauro òagũ àhrimi. Eropa árĩquerecũ ta peeyamarirã yare wereniguigũ ìgũ wereniguirire gajigũ ìgũ weretaucũ ìgũ sã òagũ dujami. Ìgũ wereniguirire weretaugũ Jesu yarã gamenererãre Jesucristore umupeonemocũ iimi.

<sup>6</sup> Eropigũ, yũ acawererã, yũhũ mũa pohrogue peeyamarirã yare wereniguigũ wagũ mũare ita-mumasibiriboya yũhũ. Goãmũ ìgũ yũre wererare weregũ itamua. Ìgũ yare Espíritu Santo yũre masicũ iirare buhegũ mũaare itamugũ iiaa.

<sup>7</sup> Peeyamarirã ya wereniguigũ ìgũ wereniguiri mari peebiro òpa iro dopa àhraa. Tarusure purirã, mari bũamutẽriñere irire mari queoro iibiricũ, iri bayarire gajirãre masima masiya mara.

<sup>8</sup> Eropigũ cornetare purigũ surara árĩgũ erã gamewejẽboro corere queoro ìgũ puribiricũ gajirã surarapũ masisome erã gamewejẽboro gamenererore. Eropirã erã gamewejẽboro core erã wejẽburi mojore amuyubirã àhrima erã.

<sup>9</sup> Eropa ta mũa sã peeyamarirã yare wereniguicũ peerã gajirã irire peebeama. Eropa peebiricũ mũa wereniguiri duhpihuri árĩbeaa erãre.

<sup>10</sup> I yebare baja wereniguiri árĩca. Eropirã irire wereniguirã erã basi erã eropa wereniguirire òaro peema.

<sup>11</sup> Ìgũ ya wereniguirire yũ peebiricũ ìagũ irire wereniguigũpũ “Gajirã yare wereniguimi,” arĩ pepicumi yũre. Eropigũ yũ sã eropa ta arĩ pepica ìgũre.

<sup>12</sup> Eropirã mũa peeyamarirã yare wereniguirã, Espíritu Santo ìgũ yare mohmemasi apira mera

turaro mohmediaraa mũa. Irire eropa iidiarã Jesu yarã gamenererãre ãaro itamuburipũre burigã mohmediaque mũa.

<sup>13</sup> Eropigũ peeyamarirã yare wereniguigũ “Yũ wereniguirire gajirãre ãaro weretaumasiburire itamuque yũre,” Goãmũre arĩ serẽporo ãgũ.

<sup>14</sup> Peeyamarirã ya mera Goãmũre serẽgũ yũ pepiri mera serẽgũ iiaa. Eropa serẽgũ yũ pepirire masibigũ yũ wereniguirire masibea. Eropa ãgũ gajirãre itamubeaa yũhũ.

<sup>15</sup> Ire masirã, õpa iirãca mari: Espĩritu Santo ãgũ turari mera peeyamarirã ya mera Goãmũre serẽrãca. Eropirã gajisubu ãaro masi pepirã gajirã erã ãaro peeboro dopa erã ya mera Goãmũre serẽrã iri sãre serẽrãca mari. Espĩritu Santo ãgũ turari mera peeyamarirã ya mera Goãmũ yare bayarãca. Eropirã gajisubu ãaro masi pepi gajirã erã ãaro peeboro dopa erã ya mera Goãmũre bayarãca.

<sup>16</sup> Mari eropa iibiricũ peeyamarirã ya mera wereniguirã Espĩritu Santo ãgũ turari mera Goãmũre, “Õagũ turagũ ãhrimi,” mari arĩquerecũ ta gajirã ne peebeama. Erã eropa peebirã “Diaye ta ãhraa,” arĩmasibeama.

<sup>17</sup> Peeyamarirã ya mera Goãmũre “Õhaa,” arĩmasia mari. Mari eropa arĩri ãaro arĩquerecũ ta gajirã peebeama. Eropirã erãre Jesucristore umupeonemocũ itamubeaa mari.

<sup>18</sup> Arĩpehrerã mũa tauro yũrũ peeyamarirã yare wereniguia. Eropigũ Goãmũ yũre eropa wereniguimasigũ ãgũ iicũ ãgũre “Õhaa,” arãa yũhũ.



19 Eropa wereniguigupũ yũ árĩquerecũ Jesu yarã gamenererã watope peeyamarropa peebirã “Diaye ta ãirã ya mera yoari boje yũ werenigu-iquerecũ duhpiburi árĩbeaa erãre. Yũhũ masa erã õaro peemasiboro dopa buhegũ merogã yũ buhequerecũ ta iri tamera õapũrica erãre.

20 Yũ acawererã, majirãgã pee masibirãgã iro dopa árĩbircãque mũa. Murã erã pee masirã árĩro dopa árĩque mũa. Eropirã ne masa dehyoarã erã ñeri iirire erã masibiro dopa ta árĩque mũa.

21 Goãmũ yare erã gojarapũ õpa ãhraa Goãmũ wereniguirire: “Gajirã ya queo wererãre oã masare yahare weredoregura. Eropigũ gaji yeba majarã masare õarire yahare weredoregura oã masare. Yũ eropa weredorequerecũ ta erã yure peesome yũ wererire,” arĩmĩ Goãmũ mari Opũ, ãhraa Goãmũ yare erã gojarapũgue.

22 Peeyamarirã yare wereniguiri Goãmũre umupeobirãre erãre ãhmuri ãhraa. Eropiro peeyamarirã yare wereniguiri Jesu yarãpũre Goãmũ turarire ãhmuri árĩbeaa. Eropiro Goãmũ yare wereripũ Jesure gamebirãre Goãmũ turarire ãhmuri árĩbeaa. Goãmũ yare wereripũ Jesu yarãpũre Goãmũ turarire ãhmuri ãhraa.

23 Eropirã mũa Jesu yarã gamenerecũ, peeyamarirã yare mũa árĩpehrerã wereniguicũ, Goãmũ yare masibirã gajirã Jesure umupeobirã sã ñajari peebocoma. Mũa eropa wereniguicũ peerã, erã mũare “Cue, goroweorã wahama,” arĩbocoma erã.

24 Árĩpehrerã mũa Goãmũ yare mũa werecũ tamera Goãmũ yare masibigũ, Jesure umupeo-

bigu sã ñajari peegu, ïgu ñero iirare masigucumi ïgu. Eropigu ïgu ñeri iirare bujawerebocumi ïgu.

<sup>25</sup> Eropigu ïgu árĩricũre ïgu pepiri sãre guñagucumi ïgu. Eropigu mereja Goãmũre “Yu opu ãhrimi,” arĩgu umupeogucumi. Eropigu “Goãmũ diaye ta mũa mera ãhrimi,” arĩgucumi ïgu mũare Goãmũ yare werecũ peegu.

*Mũa gamenererã õaro iique goroweoro mariro, arĩ gojañumi Pablo*

<sup>26</sup> Eropigu, yu acawererã, mũare ire arĩgu iiaa: Mũa gamenerecũ yujurãyeri mũa mera majarã Goãmũ yare bayadiama. Eropirã mũa gajirã buhediaa. Eropirã gajirã Goãmũ mũare ïgu wererare werediaa. Eropirã mũa gajirã peeyamarirã yare wereniguiddiaa. Eropirã mũa gajirã iri wereniguirire weretaudiaa. Mũa eropa iirã gajirãre erã Jesucristore umupeonemoboro dopa irire iique.

<sup>27</sup> Eropirã peeyamarirã yare mũa wereniguirã mũa perã o urerã, erã nũcu ta wereniguique mũa gamenererisubu. Eropirã yujurãyeri wereniguique. Mũa eropa wereniguicũ, yujugu mũa mera majagu mũa wereniguirire gajirãre weretauporo.

<sup>28</sup> Mũa wereniguirire weretaubu maricũ mũa gamenererogue peeyamarirã yare wereniguibiricãque. Eropirã mũa seyaro peeyamarirã yare Goãmũ mera wereniguique.

<sup>29</sup> Eropirã Goãmũ yare werediarã perã o urerã iripêta wereque mũa. Mũa eropa werecũ gajirã mũaare peerã mũa wererire Goãmũ ya árĩcũ õaro

masiporo. Eropirã Goãmũ ya árĩbircũ sãre òaro masiporo.

<sup>30</sup> Eropigũ Espíritu Santo Goãmũ yare gajigũre ero doagũre ìgũre wereri ocũ, ìgũ sã Jesu yarãre werediami. Ìgũ werediacũ ìha Goãmũ yare weremũhtagũrũ werenigui duhuporo.

<sup>31</sup> Eropirã mũa árĩpehrerã Goãmũ yare wererã, yujurãyeri wereque mũa árĩpehrerã gajirã erã òaro peeboro dopa, erã òaro mucubiriboro dopaa.

<sup>32</sup> Eropirã Goãmũ yare wererã árĩrã, òaro pee masirã, òaro peeñanugu wereniguirã árĩque.

<sup>33</sup> Goãmũ ìgũ yarã erã gamenererogue erã game wisicũ gamebeami ìgũ. Goroweoro mariro erã òaro árĩcũ gahmemi ìgũ. Eropirã òaro iique mũa árĩpehrerogue Jesu yarã gamenererã.

<sup>34</sup> Árĩpehrero Jesu yarã gamenererore nomere wereniguibircãro gahmea. Erã nomere maripũ wereniguimorebeaa. Goãmũ yare erã gojarapũ sã arĩro dopa ta nomere mũare òaro yũhrĩrã nome árĩro gahmea. Eropirã mũa gamenererore nome masare werebircãporo.

<sup>35</sup> Jesu yarã erã gamenererore nome erã wereniguicũ òabeaa. Eropigo gajinore masidigo nomeo igo ya wihigue ta igo marapũre serẽpiporo.

<sup>36</sup> Ire yũ wereburi òaro masique mũa. Goãmũ yare weremũhtarã árĩbeaa mũa. Eropirã ìgũ yare peenirã mũa dihta árĩbeaa. Gajirã sã ìgũ ya buherire opama.

<sup>37</sup> Mũa mera majagũ “Yũ tamera Goãmũ yare weregũ ãhraa,” arĩ pepibocumi. Eropa arĩ

pepigũ i yũ mũare gojarare “Goãmũ doreri ta ãhraa,” arĩ masiporo ãgu. Eropigũ gajigũ, “Espĩritu Santo iimasiburire ãgu apirare õaro opaa yũhũ,” arĩ pepibocumi. Eropa arĩ pepigũ ãgu sã i yũ mũare gojarare “Goãmũ ya doreri ta ãhraa,” arĩ masiporo.

<sup>38</sup> Irire ãgu masidiabiricũ yũ gojarare “Diaye árĩbeaa,” ãgu arĩcũ ãgure duhucãque. Peebiricãque ãgure.

<sup>39</sup> Eropirã yũ acawererã, Goãmũ yare weremasiburire bũrigã gameque mũa. Eropirã mũa mera majarã mũa gamenererogue peeyamarirã ya erã wereniguidiacũ, “Wereniguibiricãque,” arĩbiricãque erãre.

<sup>40</sup> Eropa iirã õaro iique. Eropirã gamenererã õaro game, goroweoro mariro iique mũa.

## 15

### *Cristo ãgu masa mũriarare werepũ Pablo*

<sup>1</sup> Dohpaguere yũ acawererã, õari buherire yũhũ mũare wererare mũare guñacũ iidiaca. Iri buherire õaro peebũ mũa. Eropa peerã iri buherire umupeonijarã õaro ãhraa mũa.

<sup>2</sup> Mũa eropa umupeocũ irire mũa cóãbiricũ Cristo mũare peamegue wabonirãre taugucumi. Mũa eropa peera pũhrũ Cristo yare mũa duhucãcũ iri mũa peera duhpiburi árĩbiriboya.

<sup>3</sup> Õpa arĩ weremãhtagura mũare. Bu gohra árĩbeaa. Mũare buhegu yũre Cristo ãgu wererare õpa arĩ werebũ: Goãmũ yare erã arĩ gojayudiro dopa ta mari ñeri wajare Cristo sĩripũ.

<sup>4</sup> Eropigũ Goãmu yare erã arĩ gojayudiro dopa ta Cristo ãgu sãrira pũru gajirã ãgure erã yaara pũru uhrenũ waboro ãgu masa mũriaru.

<sup>5</sup> ãgu eropa masa mũriara pũru Pedrore dehyoaru. ãgu eropa dehyoara pũru ãgu buherãre doce mera majarãre dehyoaru daja.

<sup>6</sup> Erãre dehyoara pũrũre yujusubu ta quinientos weca arãrãre ãgu yarãre dehyoaru daja. Gajirã ãgure ãanirã sãrituhaãorã. Gajirã ãgu ãanirã bajarã erã mera majarã arãnirã dohpaguere arãnima.

<sup>7</sup> Pũru Cristo Santiagore dehyoaru daja. Eropa ãgu dehyoara pũru arãpehrerã ãgu buhedore apinirãre dehyoaru daja.

<sup>8</sup> Arãpehrerã gajirãre ãgu dehyoara pũru yũ sãre dehyoami daja. Majigũgã queoro masa deyobigũgã ãgu masa dehyoanũrusiadiro dopa ta yũ sã Jesure umupeo nũrusiaguããhraa. Yũ eropa arãcũ erã pũrũre dehyoami Jesu yũ sãre. Yũre ta ãgu dehyoatumi pare.

<sup>9</sup> Ero corege Jesu yarãre ñero iiribũ. Eropa iidigu arãgu gajirã Jesu ãgu apinirã arãpehrerã erã docague gohraããhraa yũhũ. Eropigu dohpague sãre Jesu ãgu buhedore ãgu apibodigu arãbiriribũ yũhũ.

<sup>10</sup> Eropa arãqueregu ta Goãmu ãgu yũre mahicũ dohpaguere Jesu ãgu apidiguããhraa yũ sã. Eropigu ãgu yũre mahicũ dohpaguere ãgu gamerire ipehoa. Eropigu ãgu yũre mahicũ ãgu yagu eropa arãcãgu iibeaã. Arãpehrerã gajirã ãgu apinirã tauro yũru turaro mohmeabũ. Eropa mohmegũ yũ gamero iri mohmerire iibirabũ.

Goãmu yure mahigu yure itamuami.

<sup>11</sup> Yuhu mware ðari buherire buhegu yu árĩcũ erã mware buherã árĩcũ sãre yujuropa ãhraa. Guapu ire buherã árĩquererã ta bu gohra árĩã iiaa. Gua buheripu bu árĩri árĩbeaa. Eropirã mwapu i buherire ðaro peeabu.

*Sĩrinirã mura erã masa mriaborore werepu Pablo*

<sup>12</sup> Cristo igu sĩrira puhru igu masa mriarare gua buhequerecũ “Sĩrinirã mura ne masa mriabeama,” arĩma mua mera majarã yu-jurãyeri. ¿Dohpa arĩrono eropa arĩri erã irire?

<sup>13</sup> Ōpa masiporo erã. Sĩrinirã murare Goãmu masa mriacũ iibigu Cristo sãre ne masa mriacũ iibiriboñumi.

<sup>14</sup> Eropigu Cristo igu masa mriabiricũ ðari buherire gua werera ne waja mariboya. Mua igure umupeori sã waja mariboya.

<sup>15</sup> Masa mriari maricũ guapu Goãmu yare wererã guyarã iiboya. Sĩrinirã mura erã masa mriabiricũ Goãmupu Cristore masa mriacũ iibiriboñumi. Igu eropa iibiricũ gua “Goãmu Cristore masa mriacũ iipu,” arĩã guyarã iiboya.

<sup>16</sup> Sĩrinirã murare Goãmu masubigu, Cristo sãre igu masubiriboñumi.

<sup>17</sup> Eropiro Cristo igu masa mriabiricũ igure mua umupeori waja mariboya. Eropiro mua ñeri dipuwajacurã árĩboya dohpa peamegue wamorã.

<sup>18</sup> Masa mriariñe maricũ Cristo yarã mura sĩrimuhtanirã mura peamegue wamorã árĩboñuma.

19 Cristore mari umupeora p̄hr̄u mari s̄irir̄ague mari masa m̄riamasibirimor̄ã ár̄ir̄ã ár̄ipehrer̄ã masa tauro mojomoroc̄ur̄ã ár̄iboja marip̄u. Eropir̄ã ĩgure umupeor̄ã bu gohra ár̄ir̄ire umupeor̄ã iiboja mari.

20 Eropa ár̄ibeaa. Diaye ta Goãm̄u Cristore ðaro masa m̄riac̄ũ iic̄ãdi ár̄imi. Cristo ĩgu masa m̄riara p̄hr̄u mari sã s̄irir̄ague masa m̄riamor̄ã ta ãhraa. ĩgu eropa masa m̄riagu, Cristo masa m̄ria gubuyec̄ũnumi marire.

21 Õpa ta ãhraa i: Adán masu ár̄im̄uhtadigu ĩgu ñerire iinugara p̄hr̄u masa s̄irinugañuma. Eropigu gajigu masu Jesucristo ðarire ĩgu iira p̄hr̄u s̄irinir̄ã m̄ra masa m̄riamasima.

22 Adán yar̄ã ár̄inur̄usiar̄ague mari ár̄ipehrer̄ã s̄irir̄ãca. Eropa ta Cristo yar̄ã mari ár̄ic̄ũ mari s̄irira p̄hr̄u marire masa m̄riac̄ũ iigucumi Goãm̄u.

23 Yujur̄ayeri cururi marire Goãm̄u sihurisubu masa m̄riar̄ãca. Cristo marire ár̄im̄uhtadigu masa m̄riam̄uhtap̄u. P̄hr̄u ĩgu i yebague dujaric̄ũ ĩgu yar̄ã sã masa m̄riar̄ãcoma.

24 Irisubu ta i um̄u pehrerin̄u ár̄iroca. Eropigu ár̄ipehrer̄ã ñer̄ã opar̄ãre, dorer̄ãre, turar̄ãre Cristo cóãgucumi. ĩgu eropa iira p̄hr̄u ár̄ipehrer̄ã weca op̄u ĩgu ár̄ir̄are wiagucumi Goãm̄ure mari Pagure.

25 ĩgu wiaboro core mari Pagu Cristore ĩhaturir̄ãre ĩgu tarinugapehoboro core Cristo tamera ár̄ipehrer̄ã weca op̄u ár̄igucumi. Eropa iibu ta ár̄iro gahmea ĩgure.

26 ĩgure ĩhaturir̄ãre ĩgu cóãra p̄hr̄u s̄iririñe

sāre pehrecũ iigucumi ĩgu.

27 Goãmũ yare gojarapũgue õpa āhraa: “Árĩpehrerã weca dorebure apipũ Goãmũ Cristore. Árĩpehreri sãre apipũ ĩgure.” Eropa ta arãa Goãmũ yare erã gojarapũgue. “Árĩpehrerã weca dorebure apipũ Goãmũ Cristore,” arĩ gojagu, “Goãmũ weca doregũ Cristo āhrimi ĩgu,” arĩdiabiriñumi. Goãmũpũ Cristore eropa apiñumi.

28 Árĩpehrero Goãmũre ĩhaturirãre ĩgu cóara pũhrũ árĩpehrerã weca doregũ Cristo Goãmũ magũ ĩgu arĩtuhagũ ĩgu opũ arĩrãre Goãmũre ĩgure apidigũpũre wiagucumi. Eropiigucumi “Goãmũpũ árĩpehrerã weca opũ árĩpehreri opũ gohra āhrimi,” árĩpehrero árĩpehrerã arĩmasiboro dopa.

29 “Sĩrinirã masa mũriasome,” arĩma gajirã. ¿Erã arĩri diaye arĩcũ duhpimorã gajirã masa sĩrinirã mũra ya arĩburire erã waĩyebasanirã āhriri mũa pepicũ? Sĩrinirã mũra masa mũriabiricũ erã ya arĩburire gajirã waĩyebasara duhpiburi arĩbiriboya.

30 Gũapũ gũa buheri dipuwaja mũmũri nũcũ gajirã gũare erã ñero iidiacũ gũhya āhraa gũa sãre. Gũare eropa gũhyaquerecũ ta masa mũriari arĩcũ masirã eropa buheniguicãa gũa.

31 Mari Opũ Jesucristo yarã mũa arĩcũ ĩgure umupeonemorã mũa wacũ yũpũ turaro mucubiri pepia yũhũ mũare. Iri diaye ta āhraa. Eropigu “Yũre noho erã gamerinũ wejẽmaja gũhya āhrima,” yũ arĩcũ iri sã diaye ta āhraa.



32 Efeso majarã guarã õari buherire yu buhera waja yure pama. Masa m̄ariariñe maricũ Jesu yagu yu ár̄ibiricũ, yu ñero tarira waja duhpiburi ár̄ibiriboya. S̄irinirã m̄ura erã masa m̄uriabiricũ õpa ar̄iboya mari: “P̄uhrũñari s̄irirãca. Dohpa wasome mari. Eropirã bania, ihrirã, mari gamero dopa iirã,” ar̄iboya mari.

33 Eropa ar̄i ḡuyarire pepibiricãque m̄ua. “Ñerãre wapicurã, õarire m̄ua iirare cãdijirãca m̄ua,” ar̄ima masa. Iri diaye ta ãhraa.

34 Õarire pepirã ár̄ique m̄ua. Eropirã õarire iirã ár̄ique daja. Eropirã ñerire iinemobiricãque daja. Gajirã m̄ua mera majarã ne Goãmure masibeama. M̄ua ḡuhyas̄iriburire m̄ure eropa arãa.

*S̄irinirã m̄ura erã masa m̄uriaborore weren-  
emop̄ Pablo*

35 Eropi m̄ua mera majagu õpa ar̄i serẽpibocumi yure: “¿Dohpa ii s̄irinirã m̄ura masa m̄uriarãcuri? ¿Dohpa bejari dup̄curã masa m̄uriarãcuri? ar̄i serẽpibocumi yure.

36 Eropa ar̄i serẽpiḡu pee masibiḡu ãhrimi. Oteriyere mari oterã iriye boacũ gohra puhri wiria. Boabiricũ ne puhri wirimasibeaa. Irire masia m̄ua.

37 Puhritaridiḡu yucuguḡuere otebeaa mari. Dipayeri dihtare otea mari. Iriyeri trigo yeri ár̄iro ãhri, o gajiyeri ár̄iro ár̄ica.

38 Iriyerire mari otera puhru Goãmup̄u ñgu gamediro dopa ta iriyerire buga m̄uriacũ iimi. Eropiḡu ojod̄ucayerire ojod̄ucañu wacũ iimi ñgu.

Trigo yerire trigo sari wacũ iimi. Eropa ta puhridoremi Goãmũ.

<sup>39</sup> Árĩpehrerã dũpũcũri yujuropa deyobeaa. Masa dũpũpũ yujuropa ta ãhraa. Waimũrã dũpũ sã gajiropa ta dehyoa. Mirimagũ porã dũpũ sã gajiropa ta dehyoa. Eropirã wai sã gajiropa ta dũpũcũma.

<sup>40</sup> Eropirã umaro majarã sã ãhrima. Eropirã i yeba majarã sã ãhrima. Eropirã umaro majarã dũpũ gajiropa dehyoma. Eropiro i yeba majarã umaro majarã iro dopa árĩbeama.

<sup>41</sup> Ōpa ta ãhraa. Abe umũ majagũ gosemi. Eropi ñami majagũ sã boje ãhrimi ĩgũ sã. Yuju diaye ta boyomi. Eropirã necã sã gajiropa bejari gosesirima. Necã majarã sãre mari ĩacũ gaji dipu daberogã gosesiriri dipu dehyoa. Eropiro gaji dipu turaro gosesiriri dipu dehyoa.

<sup>42</sup> Eropa ta ãhrima sĩrinirã mũra erã masa mũriacũ. Masũ ĩgũ dũpũre mari yaara pũhrũ ĩgũ dũpũ boa waroca. Eropiro gaji dũpũ gajiropa árĩri dũpũ umũri nũcũ ojocariburi dũpũ masa mũriaroca.

<sup>43</sup> ĩgũ dũpũre mari yaacũ sĩridigũ dũpũ ñeri dũpũ ãhraa. Goãmũ ĩgũre masucũ ĩgũ dũpũ õatariari dũpũ árĩroca. Eropiro ĩgũ dũpũ mari yaara dũpũ turari mariri dũpũ ãhraa. Eropiro Goãmũ ĩgũre ĩgũ masucũ dũpũ turatariari dũpũ árĩroca.

<sup>44</sup> I yeba maja dũpũre mari yaarãca. ĩgũ sĩridigũ mũrũ ĩgũ masa mũriacũ ĩgũ dũpũ umaro maja dũpũ ta árĩroca. I yeba maja dũpũre mari opaa dohpaguere. Pũhrũ umaro

maja dɔpɔ sãre oparãca.

45 Eropa ta arĩ werea Goãmɔ yare erã go-jarapũgue: “I yeba árĩmũhtadigu Adán waĩcũgu Goãmɔ ãgure iicũ ojocarigu wañumi,” arĩ go-jañuma. Adán iro dopa árĩgɔpɔ ɔjɔtɔyagɔpɔ Cristopɔ ojocaririre ogɔ ãhrimi.

46 I yeba maja dɔpɔ árĩmũhtara dɔpɔ ãhraa. Pũhrũgue ɔmaro maja dɔpɔ árĩroca.

47 Õpa ta ãhraa: Árĩmũhtadigu Adánpɔ i yeba maja nicu mera Goãmɔ ãgu iira dɔpɔre dɔpɔcũnumi. ãgu pũhrũ aridigɔpɔ Cristopɔ ɔmaro majagɔ árĩpɔ.

48 Nicu mera dɔpɔcũmũhtadigu Adán árĩdiro dopa ta mari árĩpehrerã nicu mera iira dɔpɔcũrã ãhraa mari. Eropirã ɔmarogue aridigu Jesucristo ãgu árĩdiro dopa ta ãgu yarã árĩpehrerã ãgu iro dopa dɔpɔcũrãca mari.

49 Mari Adán iro dopa ta dɔpɔcũrã árĩrã pũhrũ Cristo iro dopa dɔpɔcũrãca.

50 Yɔ acawererã, mũare ire werediaa: I yeba maja dɔpɔ di mera diro mera árĩri dɔpɔ Goãmɔ ãgu opɔ árĩroguere ɔmaroguere ne wasome. Mari dɔpɔ boaburi dɔpɔ ãhraa. Eropiro ɔmarogue ɔmũri nũcɔ mari árĩboroguere i dɔpɔ wasome.

51-52 Iribojeguere masa erã masibirirare dohpaguere mũare werediaa: Mari mera majarã yujurãyeri sĩrisome. Eropirã mata erã dɔpɔre gohrotorã árĩrãcoma. Corneta ãgu puriturinũ eropa ta waroca marire. Õpa waroca: Corneta bũsura pũhrũ sĩrinirã mũrare Goãmɔ masugũcumi ɔmũri nũcɔ erã árĩmorãre. Eropirã

dapure gohrotonirã árĩrãca mari sã.

<sup>53</sup> Dohpaguere mari dupu boaburi dupu ãhraa. Eropigu mari Goãmũ mera árĩniguicãburire mari dapure gohrotogucumi Goãmũ. Eropigu mari sĩriburi dapure gohrotogucumi mari ne sĩribiriburi dapupure.

<sup>54</sup> Mari dapure ne boabiriburi dapure gohrotogucumi. Eropigu marire sĩribiriburi dapure eropa árĩniguiburi dapure gohrotogucumi. Iri eropa marire gohrotocũ iribojegue Goãmũ yare gojarapũgue arĩ gojadiro dopa ta eropa waroca: Goãmũ sĩririñere cóãcãmi.

<sup>55</sup> Dohpaguere ne dipaturi sĩrisome. Eropiro sĩririñe mera dipaturi mari ñero tarisome.

<sup>56</sup> Mari ñeri iira waja árĩcũ tamera sĩririñe mera ñero tarirãca. Eropiro Goãmũ doreri mari iimasibirira waja dipuwajacua mari. Eropa dipuwajacurã peamegue mari masa wamorã ãhraa.

<sup>57</sup> Mari eropa árĩquerecũ ta mari Opũ Jesucristopũ marire peamegue wabiricũ iimi. Ìgu eropa iigu árĩcũ masirã Goãmũ mera mucubiri “Õhaa,” arãa mari.

<sup>58</sup> Eropirã yũ acawererã, yũ mahirã, Cristore mũa umupeorire duhubiricãque. Eropirã gajirã mũare õari buherire erã cóãdorecũ ne cóãbiricãque irire. Eropirã umuri nucũ mari Opũ Jesucristo ìgu iidorerare õaro iiniguicãque mũa. Mari Opũ Jesucristo yare mari iicũ bu gohra ta ne árĩbeaa. Ire masirã ìgu iidorerire õaro iiniguicãque mũa.

## 16

*Gajirãre Jesu yarãre Corinto majarã niyeru erã oburire werepũ Pablo*

<sup>1</sup> Dohpaguere gajirãre Jesu yarãre mũa niyeru oburire weregura mũaare. Galacia yeba majarãre Jesu yarãre yũ dorediro dopa ta mũa sã iique.

<sup>2</sup> Semanari nũcũ soorinũ árĩcũ árĩpehrerã mũa Jesu yarãre gajirãre mũa oburi niyerure merogã gameneoque. Merogã oparã merogã oque. Eropirã wũañariro oparã wũañariro oque. Semanari nũcũ mũa eropa iique mũa pohrogue yũ ejacũ mũa obeoburi niyeru opayutuhaboro dopa. Eropigũ erogue ejagũ iripẽ niyeru wahasõ arĩripũre gojabasagura.

<sup>3</sup> Eropigũ iripũre iri niyeru aĩgãmorãre mũa beyenirãre ogura. Eropa otuhagũ Jesu yarãre mũa obeoburi niyerure aĩgãmorãre erãre obeogura Jerusalengue.

<sup>4</sup> Iri macaguere yũ iiburi árĩcũ yũ sã wagũca. Yũ eropa wacũ yũ mera ta erã sã warãcoma iri niyeru orã warã.

*Ĩgu erogue curiborore werepũ Pablo*

<sup>5</sup> Macedonia yeba majarãre ïhatari wahgãgũca yũhũ erãre. Tariagũ mũa pohro Corintogue ejagũca.

<sup>6</sup> Erogue ejagũ mũa mera bajamenũri árĩboca yũhũ gajisubu iigũ. Yoañariri boje puhiró dihta mũa mera árĩboca yũhũ. Eropirã gajipũgue yũ wacũ mũa sã yũre itamubeomasia.

<sup>7</sup> Mũaare bajamenũrigã ïadiabirica yũhũ. Eropigũ Goãmũ gamecũ yoañariri boje mũa mera árĩgũca yũhũ.

<sup>8</sup> Eropa árĩdiaqueregũ ta pentecoste bosenu árĩcũgue Efeso árĩnigũca dohpa.

<sup>9</sup> Ohõ Efesogue dohpaguere mari Opũ Jesu yare peediarã bajarã ãhrima. Erã eropa árĩã árĩcũ erãre werea. Yũhũ erãre eropa werecũ yũre ãdiabirã bajarã ãhrima. Eropigũ Efesogue árĩnigũca dohpa.

<sup>10</sup> Timoteo yũ iro dopa ta mari Opũ yare iimi. Ìgũ eropa iigũ árĩcũ mũa pohrogue ìgũ ejacũ õaro mera ìgũre bocatĩri, ìgũ mera õaro mucubiriri mera árĩque mũa.

<sup>11</sup> Eropirã ìgũre tarinũgabiricãque mũa. Eropirã ìgũ mũare goeriserecũ õaro mera ìgũre itamuque ìgũ yũ pohrogue dujaricũ. Gajirã Jesu yarã mera gũa ìgũre corerã iiaa. Eropirã õaro mera itamubeoque ìgũre.

<sup>12</sup> Apolo mari acaweregũ Jesu yagũ mũare ìgũ ãagũ wacũ turaro gamerabũ. Eropigũ ìgũre wadorerabũ gajirã Jesu yarã mera ìgũ waborore. Yũ eropa wadorequerecũ ta ìgũ dohpaguere wadiabeami. Eropigũ pũhrũ ìgũre iiri maricũ mũa pohrogue wagũcumi ìgũ daja.

### *Pablo õadoretupũ*

<sup>13</sup> Õaro pee masiyurã árĩque mũa. Cristore umupeorã duhubiricãque. Õaro guñaturarã árĩque. Eropirã Goãmũ ya turari mera turarã árĩque mũa.

<sup>14</sup> Árĩpehrerore iirã gajirãre mahiri mera irire iique.

<sup>15</sup> ¿Estéfana ìgũ ya wihi majarã mera guñari mũa? Erã Acaya yeba majarã õari

buherire peemũhtarã, iri yebare Cristore umu-peomũhtanirã árĩma erãpũ. Eropirã gajirãre mari acawererãre Jesu yarãre erã õaro itamuniguicãma.

<sup>16</sup> Eropigũ erã iro dopa árĩrãre, gajirãre Cristo yare itamurãre mũa õaro yũhricũ gahmea yũhũ.

<sup>17</sup> Ĩgũ Estéfana, Fortunato, Acaico sã yũ pohrogue eratuhamã. Ohõ erã árĩcũ wũaro mucubiria yũhũ. Mũa maricũ mũa mera mucubirimasibiribũ yũhũ. Eropigũ erã eracũ mucubiria yũhũ.

<sup>18</sup> Erã mera árĩgũ õaro sĩporãcũgũ wahabũ yũhũ. Mũa sãre eropa ta mucubiricũ iiañuma yũ pepicũ. Mũa pohrogue erã dipaturi wacũ daja erãre õaro umupeoque mũa. Eropirã gajirãre erã iro dopa árĩrã sãre umupeoro gahmea mũare.

<sup>19</sup> Asia majarã Jesu yarã mũare õadorema. Eropirã Aquila, Priscila, erã ya wihi gamenererã mera Cristo ĩgũ mahiri mera mũare wũaro õadorema.

<sup>20</sup> Ő majarã Jesu yarã árĩpehrerã mũare õadorema. Mũa mera majarãre bocatĩrirã õaro mera mojoto ñeaque.

<sup>21</sup> Yũhũ Pablo, yũ basi i dihtare gojaa. Mũare õadorema.

<sup>22</sup> Mari Opũ Jesucristore gajigũ ĩgũ mahibiricũ, Goãmũ ĩgũre dipuwaja moaporo. Mari Opũ duru dujariporo.

<sup>23</sup> Mari Opũ ĩgũ mahiri mera mũare õadorema.

<sup>24</sup> Mũare árĩpehrerãre bũrigã mahia Jesucristo mera. Eropa ta árĩporo. Iripẽta ãhraa.

## **Desano**

### **Desano: Goãmu Yare Wereripu New Testament**

copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2025-05-01

---

PDF generated using Haiola and XeLaTeX on 30 Apr 2025 from source files dated 1 May 2025

17771afc-c309-57fd-9ff3-2d5a0cd59ff1